

მ რ ი

№ 7



შ ი ნ ა ა რ ს ი: **ქართული**

ბიზლიროთეკა

აუცილებელი გზა—**შინაურისა**; მიწა—**საქანქლას**,
შიესა 2 მაქ.—**გიორგი ფოცხოველისა**; ში-
ნაური მიმდხილვა; უცნაური გაგანება—**სვ. უიფია-**
ნისა; ინგილოთა ეოფა-ცხოვრება—**ზ. ედილისა**;
ჩესია—**გ. გვაზავასი**; შთა—**ალბანელისა**.

კვირა, 21 მარტი

საზოლიტიკო, სამეც. და სალიტ. ჟურნალი

1910 წ.

აუცილებელი გზა.

—:—

ამას წინად ჩვენს გაზეთში რამდენიმე წერი-
ლი დაიბეჭდა, რომელშიაც ის მთავარი აზრი იყო
გატარებული, რომ ჩვენთვის, ქართველებისთვის,
განსაკუთრებით ახლანდელ ჩვენს მდგომარეობაში,
აუცილებელ საჭიროებას შეადგენს პრაქტიკულ
ცხოვრებისათვის მომზადება ჩვენის ახალთაობისა.
ჩემის აზრით, ეს ისეთი საყურადღებო და ჩვენთვის
დიდმნიშვნელოვანი საგანია, რომ რაც უნდა ბევ-
რი ითქვას და დაიწეროს მასზე, მაინც ზედმეტად
და მოჭარბებულად ვერ ჩაითვლება. ამ საკითხის
სიმწვავეს სავსებით გრძნობს დღეს თვით ჩვენი
ახალგაზდობა, რომელსაც ასე თუ ისე სწავლა დაუ-
სრულებია, ხოლო ცხოვრებაში კი ფეხი ვერ მოუკი-
დნია და სამოქმედო სარბიელი ვერ გაუჩენია. თვი-
თონ ახალგაზდობა, მგონია, საკუთარის გამოცდი-
ლებით რწმუნდება, რომ იგი თავიდანვე ყალბ გზა-
ზე დაუყენებიათ და მისი ყურადღება და შრომა-
მეცადინეობა იქითკენ არ მიუმართავთ, საითკენაც
უნდა ყოფილიყო მიმართული.

ჩვენ ყველანი ვჩივით, რომ უმოქმედო და ფუ-
ქი ახალგაზრდობა გვყავს, და ეს ჩივილი, თუ მარ-
ტოლოდენ ფაქტს მივიღებთ მხედველობაში, სავსებით
საფუძვლიანი და სამართლიანია. მაგრამ, მეორე
მხრით, უნდა გვახსოვდეს, რომ ეს უმოქმედობა
მარტო ახალგაზდობას ვერ დაეკისრება ბრალდე-
ბად,—მარტო მას არ ეკუთვნის ამაში პასუხისმგებ-
ლობა. პირიქით, რომ ძალიან გამოვქექოთ და ფეს-
ვები გამოვძებნოთ, ვინ იცის, იქნებ აღმოჩნდეს,
რომ ბრალი სწორედ ჩვენ—მშობლებს—მიგვიძლ-
ვის, და არა ახალგაზრდობას. სწორედ ჩვენ ვზრდით
მათ „გარიყულად“, ცხოვრებასა და რეალურ ნია-
დაგს დაშორებულად, ხოლო მერე ვკვირვობთ, რომ
მათ „ფხა“ ვერ გამოუჩენიათ და ნაყოფი ვერ მოუ-
ტანიათ!

უმოქმედობა!.. დიად, მართალია: ჩვენი ახალ-
გაზდობა უმოქმედოა, მაგრამ ერთი მიბრძანეთ:
უნარიც რომ ჰქონდეს ჩვენში ახალგაზდა კაცს, აბა
რა ფხა უნდა გამოიჩინოს, თუ ჩვენს ვითარებაში
იგი ვერავეითარ ნიადაგს ვერ პოულობს თავის ძაღ-
ლონის გამოსაყენებლად?

ჩვენ ყველანი ჩვენს შვილებს სამსახურისათვის,
მოხელეობისათვის ვამზადებთ და ამავე დროს სრუ-
ლებით არ ვფიქრობთ, გვაქვს თუ არა საშუალება,
შემდეგში მათ რამე საქმე მიუჩინოთ და მათი
ცოდნა და უნარი გამოვიყენოთ. საუბედუროდ,
ამაზე ზრუნვა სულ გვავიწყდება,—ჩვენი ერთად
ერთი ფიქრი ის არის, რომ ჩვენმა შვილებმა „სწავ-
ლა დაასრულონ“, ხოლო რა მოუვა მათ შემდეგში,
გამოადგებათ ან ჩვენ გამოვადგება თუ არა ეს მათი
„სწავლა“, ამაზე თავს არაფერ იტყვს; ეს კითხვა
მარტოოდენ ფიქრის ღირსადაც კი არაფის მიაჩნია.
და ჩვენი მთავარი შეცდომა სწორედ ეს არის.
აბა რას იტყოდით, მაგალითად, ნორვეგიელებზე,
ისინი რომ ათასობით აგზავნიდნენ თავიანთ შვი-
ლებს იტალიაში ყაჭის მოვლის შესასწავლად? უეჭ-
ველია, მათ ამ შემთხვევაში ყველა გიყებად ჩასთვ-
ლიდა, რადგან ნორვეგიაში მეაბრეშუმეობა შეუძ-
ლებელია. ჩვენ კი სწორედ მსგავსი საქმე მოგვდის:
ახალგაზდობას ისეთი ხელობისა და საქმისთვის ვამ-
ზადებთ, რომელიც ჩვენ ხელთ არ გვაქვს და, მაშა-
სადამე, ამისთვის არც კაცები გვესაჭიროება.

შედგვი ამისა დღესაც ნათლად ჩანს, ხოლო
შემდეგში, უეჭველია, უფრო დიდი და მწვავე შე-
იქნება. ჩვენი ახალგაზდობა მარტოოდენ სამსახუ-
რისათვის არის მომზადებული, სამსახური კი მას
უნდა მისცეს ან სახელმწიფომ, ან და საზოგადოებ-
რივმა ან კერძო სამეურნეო ორგანიზაციამ. ეს იმას
ნიშნავს, რომ ქართველმა ახალგაზდამ ან სახელწი-
ფო, ან კერძო დაწესებულებაში უნდა იმოგვოს სამ-
სახური.

და, აი, სწორედ იმიტომ, რომ ჩვენ არც ერთი
გავაჩნია და არც მეორე, ქართველი ახალგაზდო-

ბაც ფუჟად დაძრწის და საუკეთესო დროს ძალა-უნებურად „სუდაობაში“ ატარებს. დღეს ისეთი დრო დადგა, რომ სახელმწიფო დაწესებულებებში ქართველს უბრალო გადამწერლის ადგილსაც კი აღარ აძლევენ. ყველა ჩვენგანმა იცის არა ერთი და ორი, არამედ ათი და მეტი მაგალითი, რომ ქართველი უჯამაგრო კანდიდატის ადგილსაც კი ვერ პოულობს ადგილობრივ სახელმწიფო დაწესებულებებში. კანდიდატობა იმას ნიშნავს, რომ 3—5 წელიწადს მუქთად უნდა ემსახუროს დაწესებულებას იმ იმედით, რომ შემდეგში—ისიც „სადმე“ და არა თავის სამშობლოში—ხუთთუმნიანი «შტატის სამსახური» მიიღოს. ამიტომაც ჩვენ ვხედავთ, რომ ქართველი ინტელიგენცია თავის სამშობლოს თან და თან შორდება ძალაუნებურად,—იძულებული ხდება ლუკმა პურისათვის შორეულ გუბერნიებში გადაესახლოს და იქ სავსებით გადარჯულდეს შთამომავლობითურთ. თუ ანგარიშით ვიხელმძღვანელებთ.—გამოდის, რომ საზოგადო ფული და კერძო ჰაპან-წყვეტამშობლებისა, ე. ი. ბოლოს და ბოლოს ისევ ხალხის საეკონომიო შემოქმედების ნაყოფი იმიტომ იხარჯება, რომ რამდენიმე ზედმეტი მოხელე მოვეუზადოთ შორეულ გუბერნიების სახელმწიფო დაწესებულებათ, და ისიც ისეთი სასყიდლის გულისათვის, რომელიც დახარჯულ თავნის სარგებლადაც კი არ კმარა, რომ იგი აქ მაინც ეძლეოდეს ჩვენს თანამემამულეს; იქ კი, შორეულ მხარეში, ჩვენთვის ესეც ანგარიშში ჩასაგდება არაა, რადგან იმ მცირე სასყიდლიდანაც ჩვენს ხალხსა და ქვეყანას არა ეცხება რა.

მაგრამ შორეულ გუბერნიებშიაც ადგილის შოვნა მარტოოდენ „რჩეულთა“ და „ბედიანთა“ ხვედრია. უმრავლესობა ქართველ ახალგაზდობისა ამას ვერ ახერხებს, სწავლის დასრულების შემდეგ ბრუნდება სამშობლოში და აქ მთელი წლობით განიცდის უსაქმო ხალხის აუტანელ მდგომარეობას. ეს მდგომარეობა ასე მწვავე და ძნელად ასატანი არ იქნებოდა, ჩვენში რომ განვითარებული იყოს სამეურნეო და საზოგადოებრივი კულტურა. მაშინ შესაძლებელი გახდებოდა, ახალგაზდობას საქმე კერძო დაწესებულებებში ეშოვნა და თავის ძალღონისთვის ასე თუ ისე ნაყოფი გამოეღებინებია. მაგრამ ვინ არ იცის, რომ ჩვენი ქვეყანა ამ მხრით ძალიან ჩამორჩენილია, „უმწვერვალესობამდის კაპიტალიზმის განვითარება“ ჩვენში მხოლოდ პროკლამაციებში სწერია უბადრუკ ხალხის „გასათვითცნობიერებლად“, ხოლო ის მცირე წარმატება, რაც მოიპოვება, სხვა ხალხების ხელშია და ქართველობას იქ წილი არა აქვს. ამ გარემოებას კი ისეთი პრაქტიკული შედეგები ახლავს, რაც ქართველ ახალგაზდობას ნიადაგს აცლის და სამოქმედო ასპარეზს უზღობს.

ვისაც ეს ჯერ კიდევ არ გაუგია ან ვერ გაუგია, იმას ვურჩევთ დაიაროს კერძო დაწესებულე-


ბები ტფილისში და დასთვალოს იქ ქართველები. ექვი არ არის, დარწმუნდება, თუ საზოგადოებრივად მეს შეუძლია მისი დარწმუნება, რომ ბურჟუაზია საკუთარ ანგარიშს გარდა, ეროვნული ანგარიშთანაც სკოდნია. ყველა ეს დაწესებულებები სავსეა იმ ხალხის შვილებით, ვინც თვით დაწესებულებათა პატრონები და გამგენი არიან.

ეს არც გასაკვირია, — ყოველ შემთხვევაში არ არის გასაკვირი ისეთ მკითხველისათვის, რომელიც ჩვენს ცხოვრებას ცოტათ მაინც დაკვირვებულია. ადვილი გასაგებია, რომ კერძო საქმეების მართვა-გამგეობაშიაც საქმის მმართველ-პატრონი ისეთ ხალხს იკრებს თავის გარშემო, რომელთანაც იგი სულიერად უფრო დაკავშირებულია.

და რაც დრო გადის, მით უფრო ფეხს იკიდებს და ძლიერდება ჩვენში „თავისიანობის“ შემეცნება სხვა და სხვა ერთა შორის, რაც განკერძოვებასა და განცალკევებას იწვევს შედეგად. ამიტომაც „თავისიანობის“ პრინციპი ისეთ დაწესებულებებშიაც გადადის, სადაც მას თითქოს სრულებით არ უნდა ჰქონდეს ადგილი. ქალაქის თვითმართველობა, მაგალითად, წესით არც ერთ ერს არ ეკუთვნის, — იგი თვითმართველობაა არა სომხებისა ან ქართველების, არამედ ტფილისის ქალაქის მცხოვრებთა; მაგრამ, მიუხედავად ამისა, აბა მიბრძანდით იქ და დასთვალეთ მოხელეთა შორის სხვა და სხვა ხალხის წარმომადგენელნი. ყველა ცხადად დარწმუნდება, თუ ჩვენში კიდევ მოიპოვება ისეთი მძინარა ადამიანი, რომელმაც ეს დღემდის არ იცოდა, რომ იქიდან ქართველი თითქმის სრულიად გამოდევნილი არის.

ეს „ეროვნული არჩევა“ ისეთ სამუშაოს მიცემის დროსაც კი სწარმოებს, რომელიც თავის თავად მაინც და მაიცა სახარბიელო არ არის და; მაშასადამე, ქალაქის თვითმართველობის გამგენი ამას მაინც უფრო ადვილად უნდა „სთმობდნენ“. ნამდვილად კი „თავისიანობის“ პრინციპი აქაც მტკიცედ არის გატარებული.

ამ ორი წლის წინად ტფილისის ქალაქის თვითმართველობამ გამოსცა ცალკე წიგნად სპეციალური „მასალა“, რომელშიაც მოთავსებულია ცნობები ქალაქის მუშების შესახებ: ვინ სად მუშაობდა, რა ჯამაგირი ეძლეოდა, რომელი ეროვნებისა იყო, საიდან მოსული და სხვ. და, აი, ამ „მასალიდან“ ჩანს, რომ 348 მუშიდან სომეხი ყოფილა 193 (56%), ქართველი 81 (23%) და რუსი 74 (21%). ამ მუშებისათვის მინდობილ სამუშაო საქმეებში არის ერთი დარგი, სადაც ქართველებს მეტოქე არ ჰყავთ, — ეს არის ქალაქის ბაღებისა და მცენარეების მოვლა, რისთვისაც 18 ქართველი ყოფილა დაქირავებული. სამუშაოს ეს დარგი, ვითარცა კონკურენციის ვარეშე მყოფი, ამ შემთხვევაში მხედველობაში მისაღები არ არის, რადგან აქ ქართველების



არჩევანი იძულებითია და არა ნებაყოფლობითი. თუ ამას არ ვიანგარიშებთ, მაშინ გამოვა, რომ 59% ქალაქის მუშებისა ყოფილან სომხები. 21%—რუსი და 20%—ქართველი. ყველა ამ მუშებზე წლიურად იხარჯებოდა 98 ათასი მანეთი. ამ ფულიდან რუს მუშებს რგებია წლიურად 20 ათასი მან., სომხებს 59 ათასი მან. და ქართველებს—19 ათასი მან.

მკერმეტყველი ციფრებია. ამასთან ისიც უნდა აღვნიშნოთ, რომ დიდძალი ნაწილი სომეხ მუშებისა—ეს ჩანს იმ „მასალიდან“—ოსმალეთის ქვეშევრდომები, უცხო სახელმწიფოდან მოსულნი ყოფილან. გარეშე ადამიანმა რომ ის „მასალა“ წაიკითხოს, — იფიქრებს: ალბად ადგილობრივ მუშები ვერ უშონიათ, რომ ოსმალეთიდან გამოუწერიათო. ნამდვილად კი საქმე სულ სხვანაირად არის, — აუარებელი ადგილობრივი მცხოვრები შიმშილით სულს ჰლათავს და დღე და ღამ სამუშაოს ეძებს, ხოლო თუ სამუშაო ოსმალეთიდან მოსულმა იშოვა და მან კი ვერა, — ამის მიზეზი და საფუძველი პოლიტიკურ ეკონომიის კანონთა გარეშე არის საძებნელი..

და ასეთ გარემოებაში აბა რა გასაკვირია, რომ ქართველი ახალგაზდობა არ იყოს მაინცა და მაინც საქმიანი და ბარაქიანი. საქმიანობას თვით საქმის წყალობით ეჩვევა ადამიანი. შრომას შეჩვეულმა ადამიანმა რომ რამდენსამე თვეს „იუქმოს“ და არა გააკეთოს რა, — გარჯას ისე გადაეჩვევა, რომ მერე შრომის უღელში ხელახლა შეებმა მეტის მეტად გაუქირდება. მით უფრო დიდი გავლენა აქვს უსაქმობას ჯერ კიდევ პიროვნულად შეუუმუშავებულ ახალგაზდა კაცზე. თუ მან ერთ-ორ წელიწადს ადგილის ძებნაში ფუჭად იხეტიალა, მერე, რომ კიდევ რამ იშოვნოს, თვის საქმიანობით ვეღარ გაგვაკვირვებს და ბარაქას ვერ შეგვმატებს.

ასეთი მდგომარეობა თავისთავადაც საკმაოდ სამწუხარო და სავალალოა. მაგრამ მას თან ახლავს ერთი გარემოება, რომელიც ჩვენთვის პირდაპირ ეროვნული საფრთხეა. ეს საგანი იმდენად მძიმე, სასირცხვეო და, მაშასადამე, ძნელად გამოსათქმელია, რომ არ ვიცით, როგორ მოვახერხოთ მისი წარმოთქმა. მაგრამ ჩვენ ვალდებულნი ვართ, რახან ამ საგანზე ჩამოვაგდეთ ლაპარაკი, ეს გარემოებაც არ დავივიწყოთ და მოსალოდნელი სირცხვილი წინდაწინვე აღვნიშნოთ და თავიდან ავიცილინოთ.

ჩვენ, ქართველებს, ისე ცოტა დაწესებულებები გვაქვს, რომ ისინი არა თუ მთელი ქართველ ახალგაზდობის მოთხოვნილებას ვერ დააკმაყოფილებენ, არამედ მარტო გორიდან მოსულ საქმის მძებნელთაც კი ვერ მისცემენ საკმაო სამუშაოს და ვერ გაუჩენენ მუდმივ სამსახურს. და რახან ეს დაწესებულებები უფრო ტფილისშია, ვიდრე სხვაგან სადმე, ამიტომაც აუარებელი მოთხოვნილი და სამუშაოს მძებნელი აწყდება

საქართველოს ყველა კუთხეებიდან. ჩნდება საქონელი კონკურენცია ჩვენიანებშივე, რომელიც ისტატებს ზნეობრივს სიფაქიზეს და ახდენს დემორალიზაციას. რახან შიმშილი ძნელი ასატანია, ამიტომ ერთი მეორეს აღარ ზოგავს, ხანდახან არ ერიდება ისეთ საშუალებასაც, რომელიც ადამიანობის დამამცირებელია, ოღონდ თავისი გაიტანოს და მარტო-ოდენ ხმელი პურის მომცემი ადგილი მეორეს ხელიდან გამოსტაცოს. და გულახდილად ვამბობ: მე ვშიშობ ამ ნიადაგზე არ წამოსდგეს ჩვენი შემარცხვენიელი შუღლი, არ იჩინოს თავი „იმერელ-ამერელის“ საკითხმა, რომელიც ციხეს შიგნიდან გაგვიტეხს და ჩვენი ხალხოსნურ დაცემის დასაწყისი იქნება. ამ ჩემს შიშს ნურავინ ჩასთვლის მარტო-ოდენ მოჩვენებულად: პურის გულისთვის ხშირად ღვიძლი ძმები არ ინდობენ ერთმანეთს; მით უფრო არის მოსალოდნელი, ადგილებისა და სამსახურის მოცილებმა ბოლოს და ბოლოს პროვინციალურ „შენ-ჩემიანობის“ არგუმენტსაც მიმართონ და თავიანთი პაწაწა კუჭის ბრძოლა ქართლ-კახეთისა და იმერეთის ბრძოლად გამოაცხადონ და მთელი ერი სირცხვილის კარამდის მოგვიყვანონ.

ყველაფერი ეს ძნელია სათქმელად. ვინ იცის, იქნებ ეს არც კი უნდა მეთქვა. მაგრამ ვგრძნობ, რომ dixi et salvavi animam meam*).

ერთის სიტყვით, რა მხრითაც უნდა შევხედოთ ახლანდელ ჩვენს მიმართულებას სწავლა-განათლების საქმეში, იმ დასკვნამდე მივალთ, რომ აუცილებლად საჭირო არის ამ მიმართულების შეცვლა და დამოუკიდებელ სამეურნეო მოქმედებისათვის მომზადება ჩვენი ახალგაზდობისა. ამით ჩვენ შევამცირებთ განათლებულ პროლეტართა რიცხვს და შესაფერძალას შევქმნით ჩვენი სამეურნეო წარმატებისათვის.

შინაური.



მიწა საქონელია?!

დრამა 2 მოქმედებად.

მომქმედნი პირნი:

- თავ. რევაზი—მემამულე 40 წლისა,
- კნენა მაკინე—მისი ცოლი 35 წ. ევროპიულად ჩაცმული,
- თავ. კოტე სტუდენტი 21 წლისა ძმისწული რევაზისა, მიხა— აგენტი 30 წლ.,
- 3 გლეხი,
- ჩინო—გლეხი 60 წლ.,
- მაგდანა—გლხი კაცის ცოლი 50 წ.,
- ბოქაული—38 წ.,
- 5 დარაჯი,
- მიხა—ახალგაზდა გლეხი 25 წ.,
- ქალები, გლეხები, ბავშვები.

*) ვთქვი და შევიმსუბუქე სული ჩემი.

მოქმედება 1.

სტენა წარმოადგენს ოთახს წარსულ სიმღიდრის ნაშთით, რევანის სახლში. კედელთან სდგას ტახტი, მაგიდა და ზედ სანათი, რამდენიმე სკამი, დაძველებული 2 სავარძელი, სარკე, ბუხარი, ზედ აწყვია სურათები. მუთაქებზედ წამოგორებულია რევანი, ჩაფიქრებულია.

გამოსვლა I.

რევანი. (წამოვარდება და გაჯავრებული დადის) დასწყევლოს დემეტრე ეს ფული, რატომ ბუერი არა მქვს!.. ეს, რომ მქონდა, განა მამინ აქ სოფელში დავრჩებოდი?! გაუტყუელი ჯერ ქალაქში და მერე სსფდარგარედ!.. გავხარებდი ჩემს თავს და ჩემს ჭიასაც!.. მამანაზიდან ჩვეული ვარ კაი ცხოვრებას, და რომ ესეა არ მქვს, ბოღმა უელში მწვეს!.. არა, ერთი ჭკითხეთ ჩემს წინაზრთ, რას ფიქრობდნენ, როცა მამულებს ავირავდნენ, განა ჩვენ კი არ გვინდოდა, რომ არ დაგვიტოვებს დასაგირავებელი? ხომ ჩვენც გვინდა ბრწინავლად ცხოვრება?! რად მინდა ცარიელი თავადობა, თუ კი ჯიბეში თავები ინახვადებენ!.. ეს ოხერი გადაგირავებაც აღარ შეიძლება!.. მთელი ჩემი მამული თითქმის სამჯერ არის გადაგირავებული. უიღვითაც არავინ ეიდულობს!.. ოხ, ნეტავ კაი უიღებოდეს?! ფული კი არავის შერჩა, ან ვინ იუიდას ამ დროს? გლეხები დაღას არ იძლევიან, გადასახადები გაამრავლეს, მოსავალიც აღარ მოდის კარგი, ცხებიც არ გვაქვავია რიგინი, რომ მოსავალი გავსადოთ!.. აქ კი ფასს არ იძლევიან, ოხრად ვერთ, როცა ფული გვჭირია!.. მეტადრე, თუ ბანკის ვადაც ახლოვდება... და ეს ჩარჩებიც მამინ დაძრწიან ხოლმე... სავლესო ბანკიც აღარ ეიდულობს, გლეხებს არ შეუძლიანთ, ან სად აქვავიათ ფული, რომ ერთბაშად მოგვცენ?! ვერ მომიფიქრებია, რა ვქნა?!.. ფული მინდა... ფული... და არ ვიცი, სად ვიშოვნო!.. (დადის აღელვებული, შემოდის მიხა)

გამოსვლა II.

მიხა. კნიაზ რევანს ვახლავართ!.. როგორ გიკითხოთ?! დღეს გუნებაზე არ ბრძანდებით, როგორც გატყობთ. (ქუდს სკამზედ დასდებს და მიუახლოვდება, რევანი ხელს ართმევს)

რევანი. სწორედ, შენ გაიგე, გუნებაზე არა ვარ!.. ერთი მითხარი, ან როგორ ვიყო გუნებაზე, როცა სედავ, რომ მამული ხელიდან მიგდის, და ხსნა გამომშრალი დარჩები!.. ფული მინდა და ვერსად მიშოვნია!.. შეიძველიც არსად სჩანს!.. ამ მდგომარეობაში განა გუნება კარგი ექნება ადამიანს?!

მიხა. ოჰ!.. მართალი ხარ, კნიაზ!.. ხომ მოგეხსენებათ, რომ ფული ჩვენს დროში ძელი სმოვნელია!.. ეს ოხერი კი რა კარგია! თუ გაქვს იგი, ქვეყნაც შენია და კნიაზობაც მამინ უხდება, მეტადრე კნეინებს!.. მამინადაც ეტყობათ ფულიანობა! დემეტრე მერე კი მომწონს წყუელი ფული!.. (დაჯდება ფეხს ფეხზედ გადასდებს) ეს,.. მქონდეს, მამინ ხსნავდით ჩემს ცხოვრებას!.. კაი სხლებში მდიდრულად მორთულს, მოსამსხურეებით ვიცხოვრებდი, ეტლიდან მთელი დღე არ ჩა-

მოვსტობდი; თეატრებს, კლუბებს, ბალებს ვესტუმრებოდი ყოველ დღე, ლამაზ ქალებსაც არ მოვიშორებოდი გვერდით, იგორავებდა მის ბუნებრივად!.. ეს... კარგია, კარგია. მე და ჩემმა დემეტრე, ეს ფული!

რევანი. გეოფთა, მისა, მადას ნუ მიღვიძებ, ისედაც არ ვიცი სიბრახისაგან რა ვქნა!..

მიხა. იცი, რა გითხრათ, კნიაზ რევან?! გინდათ მამული გაგიუიღოთ?! გიმოვნიოთ კაი შეიძველს, ფულიც ნადი ექნება?! თუ მეც არ დამიფიქრებთ?!

რევანი. ბიჭოს, თუ კი მაგნაირ სიკეთეს მიხამ, რატომ არ მინდა!.. შენც დაგაჯილდოვებ!.. განა შეგიძლიან?!..

მიხა. რატომ, თუ მივიწოდებ, სამ დღეში მოგიხერხებ! (იქით) ეს კაი ლუკმა ჩავიგდე, კაი დროს მოვედი, აქედანაც შექნება ჯილდო და იქედანაც, მშვენიერ დროს მივხვე ხელი აკენტობას! მამ შევუდგები საქმეს, მანამ თუ ვი ფართხალებს ბაღეში, არ გაშექცის!..

რევანი. (ჩაფიქრდება) ძალიან კარგი, აბა მოიყვანე შეიძველები და მოფურიგდეთ; შენ შენსა წაიღებ და მე ჩემსა!.. ხომ კარგი!? მამ მოიტა ხელი!.. ხომ არ მატყუებ?!

მიხა. (გაუწვიდის ხელს და ართმევს) აბა, მოტყუება რა სავადრისია!..

გამოსვლა III.

კნ. მაკინე. (შემოდის გრებით, ამაყად თავს უკრავს მიხას) რევან, შენთან გლეხები არიან, მოლანარაკება უნდათ მამულების თაობაზე, მგონი უიღვა უნდათ!

რევანი. ვინ გლეხები?!

მიხა. აბა ვინ?!

კნ. მაკინე. ჩვენი სოფლის გლეხები!


მიხა. (იქით) უჰ მომეშვა, მე კი მეგონა, რომ ხოლოცები მოსულან! ჯერ არა მითქვამს რა და ისინიც ჯერ სოფელში არ შემოსულან, მე გავასწარი მათ, რომ აქაც დავითბო ხელები, რად მამეშინდა?! (კნეინას) აქაურები?! ოჰ!..

რევანი. ავადმყოფი ავადმყოფს მიადგა?! აბა ერთი ეს მითხარი, მაკინე, რომ მაგათ უიღვა არ შეუძლიანთ და ტყუილა უბრალოდ დროს მაკარკვიანებენ!..

მიხა. (იქით) მერე რა აქრის დროს!..

რევანი. მამულის უიღვა უნდათ?! აი ეგ არამხადები! დაღის მოცემა არ შეუძლიათ და მამულის უიღვას კი აზიანებენ?! ავი გუშინაც უთხარი, რომ მათი ზიარობები სულელურია!.. არა, ერთი, მისა, გეთავა, დაუგდე მათ უური, დაუძახებ, დემეტრე, გულიანად გაიცინებ! (კნეინას) მამ კარგი, მომგვარე აქ! (მაკინე გადის)

მიხა. განა არ ვიცი, კნიაზო!.. რას იტყვის ჩვენი სულელი ბრევი გლეხი!.. მათ ჯერ უნდადოთ ძალით წაუდოთ სხვისი მამულები, და როცა ცხვირში ამოჭკრეს, მამინ კი იგრძნეს, რომ ბატონი კადეკ მძლავრი ყოფილა!.. და დაფაცურდნენ, სცდილობენ მამულების შექნას, მეტადრე მამინ უფრო, როცა სავლესო ბანკი მტარვალად დაუნიშნეს, მაგრამ მანც ვერ მოახერხებენ! შეიძველიც ეხლა ბუერი გამიწნდა!.. მოიცადე, კნიაზო, ისეთ მდი-



დარ ხაღხს მოგორეკ, რომ გაგვიკვირდება, კონკურენტის გემამართავ!..

რევაზი. შენ ზირს შაქარი, ვნახოთ!..

მიხა. შერწმუნე, კნიაზ რევაზ, მე მოგხეგრებ!..

გამოსვლა IV.

გლეხები. ჩვენს ბატონს ვახლავართ! (თავს დაუკრავენ)

რევაზი. (ამაყად უკრავს თავს) რისთვის მოსულხართ, რა გინდათ? (კნენა ჯდება) გუშინ ხომ გაიკეთ ჩემი ზასუხა!?

ჩინო. კიდევ მოგვადით, ბატონო, გთხოვთ, გვიშველეთ რამე!.. მიწა გვჭირია ჩვენა, მოგვიმართეთ ხელო!.. თქვენი მამული ჩვენ მოგვიადეთ, ნუ დაგვღუპავთ!.. უნდად ფულის მოცემა არ შეგვიძლიან და ცოტ-ცოტას კი მოგართმევთ, მანამ არ გადავიხდით!.. საწყალო ხალხი ვართ... დღე-ღამ ვმუშაობთ, ვიტანჯებით, ვშრომობთ და მაინც ვერ ავუდივართ ჩვენს ოჯახებს, გადასახადებს, ამ ბოლო ხნებში ხომ სულ მთლად ტყავიც გაგვადვრეს!.. აბა საიდგან მოგართმევთ სრულად ფულს?!

რევაზი. თქვე ბრევებო, თუ ფული არა გაქვთ, მაშ რისთვის მოსულხართ?

ჩინო. სოფელმა გამოგვგზავნა: წადითო, ერთხელ კიდევ შეტყადეთო, იქნებ ბატონმა დაგვითმოს ჩვენს ზირბებზეო, იმ დღეს რომ მოგასხსენეთ!

რევაზი. საკვირველი რამ ხალხი ხართ!.. მე აქ ფული მჭირია, ბანკის ვალი კისერზე მაწევს, ჩანჩები კარზე მადგანან, თქვენ დალას რიგზე და დროზე არ იძლევათ, მამულს გრძობდ გადამივადებენ და ცარიელზე დასხვამენ, შერე, მე რით ვიცხოვრო?! თქვენ რაღაც გრძობების მოცემა გსურთ და ისიც ცოტ-ცოტაობით, მითხართ ერთი, როგორ აუვიდე ამოდენა ვაი-ვაგლახს?!
გამოსვლა V.

(შემოდის კოტე, მაკინეს ხელზე ჰკოცნის, რევაზს და მიხას ხელს ართმევს, გლეხებს თავს უკრავს, დგება და უტრს უგდებს)

ჩინო. ბატონო, ავი მოგასხსენეთ, ბანკის ვალს ჩვენ გადავიხდით და თქვენ მოგართმევთ საზრდას, მანამ დადებულ ფასს გადავიხდიდეთ!..

რევაზი. ხომ გითხარით, რომ ეს სისულელეა, კერე ვიღვა არ შეიძლება, და მეც ხელს არ მადლეგს!.. და ამაზე ნუღარ შელანჯავებით!..

II გლეხი. ბატონო ჩვენო, მაშ კიდევ ერთს სიტყვას მოგასხსენებთ. ფული ხომ ჯობიში დიდხანს არ დადგება, მალე წავივით სელიდგან და შერე რით-და იცხოვრებთ?! გასყვიდიც ადარა გექნებათ რა!... რაც ბევრი ფული გაქვს, იმდენს მეტს ხარჯავ, მაგალითები ბლომმა, მამულს ჭეიდან და ფულსაც მალე ხარჯავენ, შერე ცარიელზე რჩებიან! და ამით ჩვენც ვიჩავრებით, სხვები მოდიან და სახლდებიან გაუადულ მამულზე! რომ ეს ადარ განმეორდეს, მოგასხსენებთ ჩემს აზრსაც, თუ მოიწონებთ! მოდი, ბატონო, ძმურად ვიცხოვროთ, გამოვიწოდეთ ხელი!..

კნ. მაკინე. რა თავხედობა არის!..

II გლეხი. ვფიცავ აი ამ ჩვენს მამულს, ამით სტატუსობთ თქვენ სუფევლა, ეს გადავით თქვენ სასოდას. მოგვეცით თქვენი მამული, ჩვენ დაგვითმეთ და ჩვენ გადავიხდით ბანკის ვალს და თქვენც გაცხოვრებთ, სიკვდილამდინ არას დაგაკლებთ საცხოვრებელს; ესრე ჩვენ ვიქნებით ბედნიერი და მადლს მოისხამთ მშრომელი ხალხის და თქვენც უზრუნველ-უფთვილი იქნებით!.. სხვაზე ნუ გაჭედიდით, თორემ ჩვენ აგვბარავენ აქედან, და სად წავიდეთ?!.. თუ თქვენ არ შეიბრძვებით, ჩვენც თავადნო, თქვენ მამულის შვილებს, მაშ ვიღამ უნდა გვიზატრინოს?!..

რევაზი. ხა, ხა, ხა, რა სსსცილონი ხართ, თქვე ბრევებო! ჩემს საკუთრებაში თქვენ მოწყალებას მხირდებით? ხედავ, მიხა, სადამდინ მივიდა მათი თავ-გასუფობა?! გასწით, დიკარკეთ აქედან, თორემ გაჩვენებთ სეირს!.. გულ-შემატკივრებთ ადამიანდენს!.. კარგად ადებთ ხახას სხვის სიმდიდრეზე!..

გლეხები. ბატონო, ნუ გვრეკავთ!

ჩინო. კარგი აზრია, დაგვეთანხმეთ, ხელწერაღს დავსდებთ, რომ თქვენ გაცხოვროთ, როგორც შეშენის ადამიანსა, ღოცვა-კურთხევით მოგისხსენიებთ მუდამ ჟამს! გვედრებით, დაგვთანხმდით!..

რევაზი. კარგად გაეთრიეთ შეთქა, ჩქარა მომშორდით! (დადის ალელვებულო)

კნ. მაკინე. (მიხას) კარგია თქვენმა მშემ ასეთი თავხედობა, მამული გადავცეთ და მათ უყურთ: როცა იხებებენ, მაშინ მოგვიგდონ, რაც მათი ნება იქნება! (რევაზს) აბა, რევაზ, რას უღანჯავები, გაჭყარე კარეთ!

მიხა. რას იზამთ, კნენა, დროა, დროა მაგისთანა, კიდევ კარგი, ცოტა სთქვენს!..

რევაზი. მომშორდით, გაეთრიეთ (გლეხები თავდალუნულნი გადიან)

ჩინო. დავიდუბეთ, სხვას მიჭეიდას, შეიდველებიც სოფელს მოადგენენ, ეჭ რას ვიზამთ! (გადის)

მიხა. კაი ზირბებია, დემეტმანია: მამული მივცე, ე. ი. ვახუქო, გადავცე მათ, და იმას უტადო, როდის იხებებს და ლუკმას მოგიგდებს. ამის მხოლოდ ჩვენი ტუტუტი გლეხი იტუცა. სსსცილოა სწორედ!..

კოტე. არა, ვაჟ-ბატონო, სსსცილო აქ არაფერია?! რაც ესლა გაიკეთ, ეს ჩვენი გლეხის ფსიხილოგია არის!.. გულუბრევილომ, დაჩავრულმა მან მაინც გამოიჩინა გულ-შემატკივრობა! სინამდვილე მოგასხსენეს მათ! განა ტუთი-ლოა?! სად წავიდა თავადთა სიმდიდრე? ვის ხელშია ის მიწა-წყალი, რომელზედაც ებ სწყალონი მამაზაზიდან ოფელს დერიდენენ?!.. გადარბდა თავადი!.. გლეხიც დაუცა! სხვამ დაისაკუთრა მათი მიწა! ათასობით ფლანგავენ თავადნი ფულსა და შემოსავალს კი არ უყურებენ; რასაც იძლევა მამული, ვალებს ხმარდება, და დაჩვეულს შექთამჭამელს კი კიდევ სურს ბლომა ფული!... სსსსრი ფულის შოვნისა როცა ელევათ, მაშინ ექებენ შეიდველსა და ოხრად ავლებენ მამულს, რომელიც ბატონ-უმობამ ჩაუგდო მათ ხელში!..

რევაზი. აი, დაიწყო თავისებურად!... რომე, ჩემი ძმისწულა!.. სასაცილოდ გიგდებენ უველა, გვეოფა!.. განხუმიდი... ხომ გუშინაც გითხარ, რომ მე არავის მივცემ მამულს უფულოდა!..

მაკინე. არ შეგშენის, კოტე, ასრე ლაზარაკი, შენც ჩვენი წრის ხარ, და ჩვენ უნდა მოგვცე მხარი. ხმა აღარ ამოიღო, არც მსურს, რომ ეგრე ილაზარაკო ჩვენს სახლში, სჯობია, რომ არც კი მოხვიდე ხოლმე, და გირჩევ, ჩუმად ივეე!...

კოტე. განხუმიდე?!.. ხმა არ ამოვიღო?! მამ კარგი!... ესლა უფრო ვივეირებ ხმა-მადლა, ესლა უფრო ვაწნობებ მთელს ქვეყანას, რომ თქვენ იყავით და ხართ კიდევ ერის უბედურება!..

მიხა. დაიწყო!..

რევაზი. ვაი, ჩემო ცხონებულა ძმა, რა შეილი გამოგვიდა?! (გაჯავრებული) იცი, კოტე, შენი ადგილი სად არის?! აი იქ, მეტეხის ციხეში, სჯობია განხუმიდე!...

კოტე. მე არ შეშინიან თქვენი ციხისა!.. ეს ჩვენი ქვეყანა მთლად ციხეა, შეგეჩვიე კიდევ! მაგრამ მე არავის ვცარცავ თქვენსავით, არც ვჭკვამ, არც ვუზღუდე თავისუფლებას, და რისთვის უნდა ჩამსვან ციხეში?! იმ სიამართლისთვის, რომელიც თქვენ თვალებში გჩრით!?

მიხა. (იყურება თანჯარაში) გვეოფა, გვეოფა, შენთვის არა გვცალა, ხოდაკები მოვიდნენ, უნდა მამულზე მოვილაზარაკო!...

რევაზი. (იყურება, მაკინეც დგება და თანჯარაში იყურება) ვინ მოიყვანა ეგენი, ან ვინ გამოგზავნა?

მიხა. მე მოვიყვანე, მონღობილი მაქვს, თქვენ მოგირიგდეთ მამულის შესეიდვის თანაბზე, და თუ გნებავთ, დავიწყოთ!..

რევაზი. ამასუდ კაი მადლს განა როდისმე მადრსებდი!... დაუძსე, მალე მოგრიგდეთ? (მიხა მიდის, კოტე გზას უღობავს).

კოტე. მოიცადეთ, უური დამიგდეთ!.. (რევაზს) მამ არ აძლეოთ მამულს ჩვენს გლეხებს!?

რევაზი. არა!

კოტე. ესენი ხომ სხვა ქვეყნიდან არიან მოსულნი, მათ რომ იუიდან თქვენი მამული, მაშინ აქაურებს რა ხასუხს აძლეოთ?!

რევაზი. დამანებე თავი!.. რა აქაურებისა მცხელა, ჩემი თავი გამჭირებია!..

კოტე. მამ, ნუ თუ იმდენი მოთქმობაც არა გაქვთ, რომ თქვენ ნება არა გაქვთ, სხვა ტომთ მიჭვიდოთ თქვენი მამული, რომელიც ათასი წლებით სისხლით, ოფლით მოწვეულია ჩვენი გლეხის მიერ? გიცხადებთ, რომ ეგ მამული თქვენი არ არის!.. იგი კუთვნილება ერისა!... და თქვენ არ შეგიძლიანთ მისი გაყიდვა!..

რევაზი. (გაჯავრებული) რას როტავ!.. გასწი, მომშორდი აქედან, და ჩემს სახლში იფეხი აღარ შემოადგა!..

კოტე. (მისცემს გზას მიხას და მიხაც გადის)

გასწი, წადი დაუძსე; შე გაიძვერავ, დიდი ხანია გიცნობ, რა კაციცა ხარ! გასწი, ეგენი მოუთხრინან ამით სისულელას და შენც შესამს გასმენ! (რევაზს) რამდენი ხანია თქვენ განაკებდით ხალხის ბედს, ავიწროვებდით, ათამაშებდით, წურბელასავით სწოვდით მის შრომას! სულს უხუთავდით, უნამუსოდ ბევრჯელ ჭვიდეთ მისი სამუხი, სინიდასი, თითონ იგი და მისი მამული!.. თქვენ დაღუპეთ, გამეიდველნო, ეს ჩვენი ერა!... კრულავა და შეჩვენება თქვენ (იღებს ქულს) წავალ აქედან, მაგრამ იცოდეთ, თქვენც მალე გაგდებინათ აქედან ერი და წვევლით შეგამკობთ! (გადის).

რევაზი. ვის დაემსგავსა ეს უმცხავსი, რა რიგად გაგვლანძდა!..

მაკინე. ესლანდელი ემსწვილ-კაცობა მთლად გადარეულია, არა ესით რა! სწავლამ კი არ განათლავა, ზიროქით — გარეგნა!.

გამოსვლა VI

მიხა. (შემოდის და თან მოჰყვებიან ხოლოკები) ეს კახლავთ ჩვენი კნიაზი, ჭვიდის თავის მამულს! მოურიგდეთ და ხელ-წერილიც დაწვეოთ.

რევაზი. დიდის სიამოვნებით გავეიდი, თუ ფულს ნადდად მომცემენ, დავუკლებ კიდევ!...

ხოლოკი. ჩვენ, კნიაზო, დავათვალთვით თქვენი მამული და გადავსწვევით ვიუიდათ სულ მთლად, აი ამ კაცს დავავალეთ, რომ თქვენ მოგირიგდეთ. ფულს ნადდად მოგართმევთ, საგლეხო ბანკი გვემარება. თუ მოგრიგდით, ბესაც მოგართმევთ ორას - თუმანს. მხოლოდ კი მამული დაცლავინეთ უველასა, რადგან ჩვენ გვეჭირვება და არავის მივსტეხთ აქ დგომის ნებას!..

რევაზი. მე მცნობა, რომ მოგრიგდებით, მე თანხმად ვაქნები თქვენს ზირობებსზე, და ადგილსაც დავაცლავინებ აქაურებს, ხვალვე ვეტევი მაზრის უფროსს! აბა მიხა, მითხარი მათი ზირობები.

მიხა. (ჩუმად) გირჩევთ, კნიაზო რევას, არ გაგიხსნებენ ხელიდან ეგ შეიდეგენი, დაუთმეთ მათ ზირობებს და მაშინ მთელ თქვენ მამულს იუიდან. მაგათ დავათვალთვით მამული, მე სუველგან დავსდევდი, ნახეს ველიც, მიხდარიც, მთა და ბარიც და გადასწვევით მთლად შეიძინონ ეგ მამული, თუ დასთანხმდით დღიურზე საერთოდ სამ თუმანს. ამ ზირობებსზე დავსწვით ქალდას და ბანკიდან მიიღეთ ის ხელ-მეტი ფული, რაც გადაჩნება თქვენს ვალებს. ორას თუმანს კი ესლავე მოგართმევთ ბეს! ამასე ნადდ შეიდეგეებს ვერსად მოგინით. ეს საქმე ერთ თვეში გათავდება! იცოდეთ, რომ ამით თვით მთავრობაც ემარება!.. მე გირჩევთ მიჭვიდოთ მათ მამული. (კოტე ჩუმად შემოდის კარს უკან იმალება).

რევაზი. რა ვქნა, თუმც ცოტას, მაგრამ ისეთ ზირობებში ვარ, რომ უნდა დავსთანხმდე!.. ან თუმინანი ვენსებიც კი უნდა სამ თუმნად გადავავლო! ვალებს მაინც მოვშორდები და მეც დამჩნება, ბევრი თუ არა, საცხოვრებელი მაინც! მე მზად ვარ, თანხმად ვარ! მამ დავწე-

რთი ზიარების ქაღალდი!... წამოდით ჩემს ოთახში (გაღიან)

მაკინე. მადლობა ღმერთს, ძლივს არ შედიხარ ფული! ხვალვე გავსწევ ქაღალდს და ჯერ შევიმოსებო რიგზე, როგორც შეშენის კნეინასა, და შერე, ისრადე ხან აქეთ და ხან იქით, (იყურება კრძალვით) ჩემს ვასიკოსაც გავასწავლებ, და დროს ერთად გავატარებთ. ესლავე მოვემსახდები ქაღალდში წასასვლელად, რომ ხვალვე გაუდგე გზას. იმხარულე, კნეინავ, თორემ ბერდები (გარბის გახარებული)

გამოსვლა VII

კოტე. (გამოვარდება და აღელვებული იყურება) ღმერთო ჩემო, ამას რას სჩადიან!.. ოჲ ჩირქნო ჩვენი ერისა! რა რიგ მძგხნათ!.. ნეტავ მოვა დრო, რომ თქვენ აიგავთ დედამიწის ზურგიდან! ნახეთ, რა გაჩქარებულნი ჰქვიდით მამულსა... ჰქვიდეთ... ჰქვიდეთ!.. მანამ დრო კიდევ თქვენია!.. შერე რაღას გაჰქვიდით?! იქნებ გგონიათ, რომ შესძლეთ გაჰქვიდეთ გლეხ-კაცის სინიდასი, ეხა, სარწმუნოება ან თვითონ იგი?! აქამდის მძინარე ერი ვერ ხედავდა მანჯღვერებს სიკვდილს, მაგრამ ესლავა კი, თქვენი ამ საქციელთ იგი გამოაფხიზდეთ და ვაი თქვენსა, ფეხით გაგთელავს, გაგსრესავს; რომ თქვენი სხსესებელი არ იყოს ამ ქვეყნად და არც იმ ქვეყნად!.. ოჲ, თქვე იუდეო!... (უერ-მიხილი, ძალზე აღელვებული სკამზე დაეშვება).

ფ ა რ დ ა .

გიორგი ფოცხოველი.



შინაური მიმოხილვა.

—:—

გაზეთებმა გამოაქვეყნეს შინაგან საქმეთა მინისტრის ცირკულიარი, გამოცემული 9 ქრისტეშობისთვის 1909 წელს, რომელშიაც ბ. მინისტრი უხსნის გუბერნატორებს, თუ რა ფარგალში უნდა მოქმედებდნენ ისინი განსაკუთრებულ და სამხედრო წესების არსებობის დროს. ცირკულიარის შინაარსი ნათლად გვეუბნება, რომ ის წარმოშვა ადგილობრივ გამგებლების თვითნებობამ. აქ ბევრი რამ საყურადღებოა, მაგრამ ჩვენ ყურადღებას მივაქცევთ მხოლოდ ერთს მუხლს. მინისტრი სწერს: „ჩვენი კანონმდებლობის შინაარსით თვითნებური ადამიანი პასუხისმგებელია მხოლოდ მის მიერ ჩადენილ და არა სხვების დანაშაულობაში, ამასთანავე ას პასუხს აგებს მხოლოდ ერთ ჯერ.“

მიუხედავად ამისა ზოგიერთი გუბერნატორი სავალდებულო დადგენილებებით პასუხისმგებლად ხდიან „მთელ სოფლის საზოგადოებას“, პედაგოგიურ საბჭოს შეგირდების დანაშაულობისათვის და

სხვა; ზოგიერთ დადგენილებაში ისიც კია აღნიშნული, რომ ამ დადგენილების დამრღვევი პასუხს აგებენ ადმინისტრაციული წესითაც და სამართლის წინაშეცო“.

ეს ადგილი მეტად საგულისხმოა ჩვენთვის. არავისთვის დასამალავი არაა, რომ ჩვენი სოფლები უზომოდ შეწუხებულია ადმინისტრაციულ პირების დარბევით. საკმარისია ერთი ვინმე გავარდნილი გამოჩნდეს სოფელში, რომ მთელ საზოგადოებას ეკვყუცია ჩაუყენონ. და ეს დარბევა, ეს საერთო შეწუხება სწარმოებს არა მხოლოდ მაშინ, როცა ვგრედ წოდებულ პოლიტიკურ დანაშაულებს ეძებენ, უბრალო მკვლელობაც კი ამვე საერთო დარბევას იწვევს. მაგალითი უთვალავია. თუნდ აი ერთი კვირის ამბავი. როგორც „ახ. სხივი“ გადმოგვცემს, სოფელ ქალადიში მომხდარა საზიზღარი მკვლელობა, ვილაცას ერთი მელუქნე მოუკლავს. ცხადია, ეს უბრალო სისხლის სამართლის საქმეა და მეტი არაფერი. მონახე მკვლელი და შესაფერ პასუხისგებაში მიეცი. მაგრამ არა, „დილითვე ჩამოვიდა სენაკიდან ამ საქმის გამო ბოქაული, მან შეკრიბა ხალხი და დილიდან სალამომდის დამწყვდელი ყავდა“. თუ ასეთი მცირედი საქმე მთელი საზოგადოების დატყვევებას იწვევს, რაღა იქნება, როცა დანაშაულის პოლიტიკური სუნი უდის?

სწორედ ეს გზა დარბევისა, ეს უდანაშაულო პიროვნების გათელვა, ხალხის შეწუხება, დროს წართმევა ჩვენში სისტემად გადაიქცა. და რომ ამიერიდან მანაც ბ. მინისტრის განკარგულება მიღწევდეს დიდ თუ პატარა მართველთა ყურებად, ესეც ერთნაირი ღვთის წყალობა იქნება.

* * *

საზოგადოებრივ სიმწიფის საუკეთესო მაჩვენებელია პასუხის მგებლობა. თუ თქვენ თქვენ მიერ არჩეულ პირს, თქვენი საზოგადოების წევრს პასუხს ვერ მოსთხოვთ, თუ დანაშაულები დაუსჯელად რჩება, აშკარაა, ასეთი საზოგადოება დასნეულებულია, ის გახრწნის გზაზე და მდგარი. ჩვენმა ცხოვრებამ უთვალავი მაგალითი მოგვცა, საცა დანაშაულები, საზოგადო ქონების გამფლანგავი დაუსჯელი დარჩა და არხეინად გრძნობს თავს. დღეს კაცი სამართალში უნდა მივეცათ, ხვალ საპატიო ადგილზე ირჩევთ. ეს განა გზა დაღუპვის და გათახსირების გზაა—ის საზოგადო საქმეებში აბატონებს ისეთს ადამიანებს, რომელნიც უტიფრად სთელვენ საერთო ინტერესებს და პირად მისწრაფების გულისთვის ყოველივე საზიზღრობას სჩადიან. ქუთაისის თავად-აზნაურობის უკანასკნელ კრებაზე ნათლად გამოიკვიათ, რომ დეპუტატთა საკრებულოს 13.000 მანათის გასამართლებელი საბუთები არ მოეპოება. აქ ლაპარაკი აღარ შეიძლება. საზოგადოებამ ამოვიჩია, თავისი ქონება ჩაგაბარათ, ანგარიშს ვერ აძლევთ? ყოველი სალი, თავმოყვარე და მომავლისათვის მზრუნავი საზოგადოება გეტყვიან: მიბრძანდით! საუბედუროდ კი

ჩვენ სულ სხვას ვხედავთ: არც პასუხის მგებლობა, არც უნდობლობა. ბატონებო! ასე არ შეიძლება, როდისმე უნდა შევეჩვიოთ წესიერებას, თვარა ასედაც დაძაბუნებულნი სრულიად გავისრისებთ, არამც თუ სხვების ჩვენსავე თვალში დავკარგავთ ყოველივე ნდობას და პატივისცემას.



უცნაური გაგონება.

(დასასრული)

—:—

— მახსოვს, პატარა ვიყავი — პატარა ხნის ფიქრის შემდეგ განაგრძო ყმაწვილმა კაცმა — ერთ გლესს, მშვიდსა და უწყინარს, საკუთრების წართმევა დაუპირეს. სახლის გვერდზე პატარა კალო ჰქონდა, რომელსაც გვერდზე გზა ჩაუდიოდა. იმ სოფლის მებატონე-თავადი ამტკიცებდა, რომ წინად გზა იმ კალოზე მიდიოდა, რომ გლესმა გზა ზევით ასწია და ადგილი დაისაკუთრა. ატყდა ჩვეულებრივი დავიდარაბა. არც გლესი უთმობდა, არც თავადი, სასამართლოში წასვლა კი არც ერთს არ უნდოდა. გლესს შემორაგული ჰქონდა თავისი პატარა კალო და ბატონის ბრძანებასა და მუქარაზე, რომ ღობე თავისი ხელით აეღო და გზა გაეხსნა, მოკლე პასუხს უთვლიდა: მოდი და შენ აიღეო. თავადი მეტის-მეტი მრისხანე მემამულე იყო. მისი შიშით მთელი ის არე-მარე ცახცახებდა და კანკალებდა. მისი გასამართლება მოკლე იყო და მარტივი. პატარა, უბრალო საქმეში მათრახს ამუშავებდა, დიდში — ხმალსა და ტყვიას. ჰყავდა მოურავი და რამდენიმე ტყისა და ბარის მცველი ოსნი, რომლებიც თავიდან ფეხებამდე შეიარაღებულნი იყვნენ და ბატონის პრესტიჟის ასაწევად და ასამაღლებლად, როგორც ნადირზე, ისე ნადირობდნენ გლესებზე. საკმარისი იყო, გლესს ბატონობით არ მოეხსენებინა ეს კაცის-მჭამლები, რომ მათრახით აატყველებდნენ და თუ ვინმე სიტყვის ამაღლებას გაბედავდა, ან ურჩობას გასწევდა, ან ტყეში უბრალოდ შევიდოდა, ან ხანჯლით დასჩეხავდნენ, ან ტყვიით დასჭრიდნენ. აი რა ხალხთან ჰქონდა საქმე იმ გლესს და ის მაინც უთვლიდა მათ: მოდიოდა და თქვენ თქვენის ხელით დაანგრეთ ჩემი ღობეო.

ეს დღეც დადგა. იმ დროს მე შემთხვევით გაჩნდი გლესის კარ-მიდამოსთან. თავადურად გამოწყობილი მოურავი სამი შეიარაღებული ოსით მიადგა გლესის კალოს. მათ დანახვაზე გლესის ცოლი, რომელიც იმ დროს პატარა ბავშვით თავის ეზოში იდგა, გაფითრდა, ბავშვი მიწაზე დააგდო და თავდაც მუხლებში ჩაიკეცა. ბავშვებმა საშინელი წივილ-კივილი ასტყეს. მეზობლები გამოიფინენ კარ-

ში და ერთ ადგილას გაქვავებულივით, გადიდებული თვალებით და გაფითრებული სახეებით ელოდნენ, რა შედეგი მოჰყვებოდა ამ ამბავს.

მოურავი მიუახლოვდა ღობეს, მაგრა შეანძრია იგი, ერთი სარი ამოაძრო, შორს გადააგდო და უბრძანა ოსებს, ღობე მთლად დაენგრიათ და დაეშალათ. ამ დროს გაისმა საზარელი, თავზარდამცემი ხმა და სახლიდგან გამოვარდა პატრონი... საზარელი იყო მისი სახე, საზარელი იყო ცული, რომელიც მას ხელში ამართული ჰქონდა. ყველა მნახველისთვის ცხადი იყო, რომ გლესს თავი განწირული ჰქონდა და ისიც ცხადი იყო, რომ იათად არ მისცემდა არავის თავის სიცოცხლეს. ოსებმა უნებურად უკან დაიხიეს და თოფები მოიმარჯვეს. მოურავი ოსებს ამოეთარა. გლესი მიუახლოვდა ღობეს, გაჩერდა და რიხიანი ხმით შესძახა: დედი-თქვენის შვილი იქნება, ვინც ღობესთან მივა! — მიდით, დაანგრეთ ღობე — დაიყვირა გონზე მოსულმა მოურავმა, მაგრამ ოსები ღობესთან მისვლას ვეღარ ჰბედავდნენ და მხოლოდ თავის დაცვაზე-ღა ჰფიქრობდნენ. მოურავმა რომ დაინახა, რომ გლესი მხოლოდ მაშინ იხმარდა ძალას, როდესაც ღობეს ვინმე მიეკარებოდა, გული მიეცა და გინებასა და მუქარას მიჰყო ხელი, მაგრამ ვერც ამითი გააწყო ვერაფერი და ბოლოს ერთი ოსი ბატონთან აფრინა.

— დაიცადე, ბატონი მოვიდეს! — დაემუქრა გლესს.

— მოვიდეს, მე არავისი მეშინიან! — უპასუხა გლესმა.

საქმე რთულდებოდა. მებატონის მოსვლა კარგს არაფერს მოასწავებდა. ან უნდა დაეთმო გლესისთვის, და სირცხვილი ექამა, რაც მის ავტორიტეტს მეტად დასწევდა სოფელში, ან ღობე უნდა დაენგრია, და ამას კი სისხლის ღვრა მოჰყვებოდა.

ამ დროს გლესიც ემზადებოდა საომრად. შევიდა სახლში, გამოიტანა თითბრით მოჭედილი დიდი ხანჯალი, შემოიკრა წელზე, ჩოხა შემოიკალთავა, სახელოები გადაიკეცა, მხრებში ძალზე შეინძრა და მოლოდინში კალოს შუა-გულში გაჩერდა.

ლამაზი იყო ის იმ დროს... ახლაც თვალ წინ მიდგია ეს დიდებული სურათი ადამიანისა. იმ დროს ის გლესი არ იყო, არც გლესზე მეტი, მაგრამ უბრალო ადამიანი. ის იყო ლომი... არა ლომზე უმაღლესი. ლომი მეფეა პირუტყვებისა, მაგრამ პირუტყვია. ის კი ლომი იყო და იმავე დროს ადამიანი, ლომ-კაცი, თუ შეიძლება ასეთი არსება წარმოვიდგინოთ. მთელი მისი არსება გამოჰხატავდა ფიზიკურსა და სულიერ ძალას ერთად შეერთებულს. თვალები არ ჰქონდა ამღვრეული, როგორც ამღვრევა გაბორბტებულსა და გაავებული ადამიანს. არა, დაწმენდილი ჰქონდა, ყველაფერი აწონ-დაწონილი და გათვალისწინებული ჰქონდა და იმავე

425
9
საქართველოს
საბჭოთაო
საზოგადოებრივი
საფლავი

ინგილოთა ყოფა-ცხოვრება

(ეთნოგრაფიული წერილები)

2

სოფლები

ტურფა-მიმზიდველს წალკოტს წარმოადგენს საინგილოს სოფლები, მთლად ბალ-ვენახებად ქცეულნი, უშველებელ კაკლის და წაბლის ხეებში ჩაფლულნი ერთს გაუთავებელს ქალა-ტყეს მოგაგონებთ, რომელთ შორისაც აქა-იქ მორცხვად გამოიქვირებიან წითელის კრამიტებით გადაჭედილი ინგილოური აყარიანი სახლები. ინგილოები ერთს ადგილას თავმოყრილნი და შეჯგუფებულნი კი არა სცხოვრობენ, როგორც ეს ქართლ-კახეთში არის, არამედ დიდს მანძილზედ არიან გაფანტულნი, ზოგი აქა სცხოვრობს, ზოგი იქ, ვისაც სად ეხერხება და ხელთა აქვს ადგილ-მამული. ისეა ზოგჯერ სოფელი გაფანტული და ბალ-ვენახებში და ტყეებში მოდებული, რომ ვერც კი მიმხვდარა კაცი, სად იწყება სოფელი და სად თავდება. სახლ-კარი ისე აქვს მოწყობილი ინგილოს, რომ სახლს იქვე გვერდით აკრავს ბაღი, ვენახი, ბოსტანი, თხილიანი და ზოგჯერ, სახნავ-სათესი მამულიც-კი. ამის გამოა, რომ ერთს ადგილას, ერთმანეთის მეზობლად სამ-ოთხს მოსახლეს თუ ნახავთ, თორემ მეტს არა. ინგილოს თავისუფლად და ფართოდ უყვარს ცხოვრება, რომ მისი კარ-მიდამო მარტო მის ხელთ იყვეს, და სხვა ვინმე ხელს არ უშლიდეს, და იმავე დროს ეს კარ-მიდამო იმდენი უნდა იყვეს, რომ თავისუფლად შეეძლოს არამც თუ მას გავლა-გამოვლა, არამედ შინაურს ფრინველსა და საქონელსაც. ინგილოთა სოფლებს ამიტომ უშველებელი მანძილი უჭირავთ და ხშირად 5—10 ვერსზედ არიან გაფანტულნი.

მაგრამ საინგილოში ყველა სოფელი ასე კი არ არის მოწყობილი. ამ საერთო სურათიდან გამო-ნაკლისს შეადგენს სოფ. ყორაღანი, ქეთუქლო, შოთავარი, ძაგამი, ალათემური, თასმალო, ყონდა-ლი და მოხული. აქ მთელი სოფელი ერთ ქუჩის პირად სცხოვრობს, სახლები ჩამწყრიებული არიან ერთს დიდსა და ფართოს ქუჩაზედ, რომლის აქეთ-იქით სუფთა და განიერს არხებში საყვარლად მიხზილავს წყალი, რომლის ნაპირსაც ამშვენებს ფურცლისა და კაკლის ხეები. საუცხოვო შთაბეჭდილებას ახდენს ადამიანზედ ასეთი სოფელი, მისი ფართო, მოკირწყლული ქუჩა; საყვარლად ჩარიგებული ხეები, რიგზედ გაშენებული სახლები, მოსურათებული ქის კარები ფიანდახად გეშლებათ და ოცნებას კულტურულ ევროპის სოფელში გადაჰყვებართ. ყველა ეს სოფლები ნამდვილს კონტრასტს წარმოადგენენ დაწარჩენ სოფლებთან

დროს მისი სახე გამოხატავდა სიმტკიცესა და უზომო ვაჟ-კაცობას.

მებატონე მოვიდა. ბევრი იფაფხურა, გლეხის ბიძაშვილებს დაუძახა, უბრძანა დაეჭირათ და შეეკრათ. ბიძაშვილებმაც დაუბარეს დაჭერა და შეკვრა, მაგრამ ვერას გახდნენ. შეიძლებოდა მხოლოდ მისი მოკვლა, სხვა ვერავითარი ძალა ვერ გადაეღობებოდა წინ. შერცხვენილი ბატონი თავისი მხლებლებით დაბრუნდა სახლში. ღობე ახლაც ხელუხლებელია და ბატარა კალოზედ ყოველ ზაფხულს შორს გაისმის გლეხის მაღალი ჰოროველა...

— დიახ, ქალბატონო—მიუბრუნდა ის უკვე ზრდილობიანის და დამშვიდებულის კილოთი ჩვენს მანდილოსანს— გლეხს თავმოყვარეობა აქვს, უფრო მეტი ვიდრე ჩვენ; არც მხდალია, როგორც ჩვენ და არც უჭკუოა, რადგან ჩვენ უფრო მომზადებულნი ვართ ცხოვრებისათვის, სარბიელიც მეტი გვაქვს და საშუალებაც და ბოლოს და ბოლოს იმავე გლეხის სარჩენი ვართ, ის კი ცარიელის ხელით ებრძვის ბუნებას, ებრძვის მხეცს,—ნადირს, ებრძვის ადამიანს და თავსაც ირჩენს და სხვასაც ბევრს არჩენს. არც უპატიოსნოა, თუ დამიჯერებთ. ფულს რომ ერთი-ერთმანეთს ასესხებენ, მოწმესაც არ დაისწრებენ და თავისას არაფერს გაატანენ, მაგრამ არც თქვენსას ინდომებენ. არა, არა—გულით წარმოსთქვა ყმაწვილმა კაცმა — ჩვენ სწორედ მაგათი იმედი უნდა გვქონდეს, მაგათი—ბუნების შვილთა, რომელთა სული ნოყიერს, ხელუხლებელ მიწასა ჰგავს: შეიმუშავეთ, კარგი თესლი დასთესეთ, და ისეთს მოსავალს მოიმკით, რომ სულსაც გაახარებთ და ხორცსაც...

უცნობი გაჩუმდა. არც ჩვენ ვიღებდით ხმას. ყველა ეს ისეთი უცნაური გაგონება იყო ჩვენთვის, რომ არ ვიცოდით, დაგვეჯერა და მით გული გაგვეხარებინა, თუ გვასულელებდა და სულელად ჩაგვეთვალა ჩვენი თავი, და სხვა რომ ვეღარ მოვახერხებთ რა, ფანჯარაში ვიყურებოდით და ერთი სურვილი-და გვქონდა, დაგვენახა ერთი გლეხი მაინც, რომ მის არსებაში ამოგვეკითხნა ის, რასაც ჩვენ უცნობი გვიხატავდა, მაგრამ არე-მარეს ბინდი წამოეპარა და მკრთალად განათებულ ბატარა სადგურზე ვეღარაფერს ვარჩევდით...

სვ. ყიფიანი.



შედარებით და თითოთ საჩვენებელნი არიან მთელს საინგილოში. ეს სოფლები უფრო ახლო დროის გაშენებულნი არიან, ისინი გამოყოფილან ძველის სოფლებიდან; როცა იქ ხალხი გამრავლებულა, ვერ შეჭვებთან იქაურს ცხოვრებას და ცალკე სოფლები დაუარსებიათ. ამ სოფლებში მიუხედავად იმისა, რომ ერთს ქუჩაზედ არიან ჩამწყრივებულნი, სადაც კი შეიძლება, ისევე სიფართოვე და თავისუფლებაა დაცული, როგორც დანარჩენს სოფლებში.

სოფლებში ვერსად ვერ ამჩნევთ საბძლებს, ბელლებს, ჯიხურებს და სხვას. ყველა ამათ მაგიერობასა სწევს ერდო-ყავარი, ანუ როგორც ინგილოები ეძახიან „აყარი“. აყარი არის ბზის შესანახიც, თივისაც, ხორბლისაც, ბრინჯისაც, ერთის სიტყვით გლეხი-კაცის ყოველივე სარჩოსი. აყარია მისი საბძელიც, ბელელიც და საკუჭნაოც. ამის გამოა, რომ გლეხ-კაცი სცდილობს აყარი ისეთის მასალისა გააკეთოს, რომ ცეცხლისაგან უზრუნველ ჰყოს და ისე მოაწყოს, რომ რაც შეიძლება ბევრი დაიტვიროს. აყარს ამიტომ ძალიან მაღალსა, ფართოსა და წოწოლას აკეთებენ. აყარს წოწოლასა და მაღალს იმიტომაც აკეთებენ, რომ საინგილოში ბუხრის მიღები არ იციან, მთელი ბოლი აყარში გროვდება და აქეთ-იქიდგან ქუჭრუტანებიდგან და კრამიტსა და კრამიტს შუა დარჩენილს ხანებიდგან გარედ ნელ-ნელა გამოდის. კრამიტით სახლების დახურვა საინგილოში ამ ბოლო დროს შემოვიდა, წინად კი სულ ლერწამით ჰხურავდნენ. ეხლა კი თითქმის ყველანი კრამიტითა ჰხურავენ სახლებსა და ძალიან ღარიბი უნდა იყვეს ინგილო, რომ ლერწმით დახუროს სახლი, მით უმეტეს, რომ ლერწმით დახურული სახლი საშიშია ცეცხლის მხრივ. ლერწმით დახურვა კი სახლისა აქ საუცხოვო იციან, ისეთი მაგარი, სქელი და მკვიდრი სახურავი იცის, რომ თავისუფლად სძლებს 25 წელსა.

მაგრამ თავი დავანებოთ ამას, დავიწყით თვით ეზო-კარმიდამოდგან. ეზო ინგილოს ფართო და განიერი აქვს და რამდენიც მეტად შეძლებულია ინგილო, იმდენად უფრო დიდი კარ-მიდამო აქვს. ეზო ყოველთვის დავარაყებულია და სუფთა და მთელი ზაფხული მწვანედ გაუდის ღაღანი. ისეთ ნაირად უყვარს ინგილოს მწვანე ხავერდის ფერი ყდა კარ-მიდამოსი, რომ, თუ ვინცობაა, ზაფხულის სიცხემ ძალა დაატანა და ხამობა შეეპარა, მაშინვე წყალს მიუგდებს, მორწყავს და ხელ ახლა გააცოცხლებს მიმქნარს ბალახს. კარმიდამოში ვერ ნახავთ ასეთს ვამოუსადევარს ბალახს, როგორც ჭინჭარია, ანწლი და სხვა. ყველა ამათ ინგილო განგებ ძირიან ფესვიანათ აგდებს, სწმენდავს ეზოს მათგან.

კარ-მიდამოს ირგვლივ შემოვლებული აქვს ქვიტკირის კედელი ერთის საყენის სიმაღლე, უფრო ხშირად კი ქვიტკირის კედლის მაგიერობას მშვენიერად წნული მაღალი ღობე ასრულებს. ამ გვარს

ღობეში ქუჩის მხრიდან ჩატანებულია ფართე ჭიშკარი, რომელიც ზევიდგან გადახურულია კრამიტით. რაც გინდა ღარიბი იყვეს ინგილო, უმჯობეს იმას გაძლება არ შეუძლიან და კარმიდამოს ღიას არასოდეს არ გაუშვებს. სახლს ინგილო გზის პირად არა სდგამს, არამედ შიგნით ეზოს ბოლოს. ეზოში ნახავთ რამდენიმე პირად დაწყობილს, რომელიმე კუთხეში, ფიჩხსა და შემას, რომელსაც ინგილო პირველს გაზაფხულზედ ამზადებს ხოლმე მთელის წლისათვის. აქვე ეზოში აქვს ხის ძირას მიწაში ჩაგდებული ღვინისა და არყისათვის ქვევრები. საინგილოში მარნების კეთება არ იციან, ქვევრები ყველანი გარედ ეზოში არის მიწაში ჩაგდებული და ზევიდგან მხოლოდ მიწა აქვთ წაყრილი. ამის გამო დადგება თუ არა ზაფხული და ძალზედ დაატერს დედამიწას მზის სითბო, ღვინო მჟავდება და ფუჭდება, ეზოშივეა მოთავსებული ბოსელი, ანუ, როგორც ინგილოები ეძახიან საქანლის სახლი, რომლის აყარიც სახლის მაგიერობას ასრულებს და თორნე, რომელიც მხოლოდ ნახევრად არის მიწაში ჩასმული და პურის მცობელი ზეზეულა აკრავს პურსა. საქათმის ხსენებას კი ვერა ნახავთ მთელს ეზოში, შინაური ფრინველი ხეებზედ არის შეჩვეული და მთელი ზამთარ-ზაფხული იქა ბუდობს, ხეები კი ყოველ ეზოში მრავლად არის.

თვით სახლი ინგილოსი უმეტესს შემთხვევაში ქვითკირისაა და მხოლოდ იშვიათად შეხვდებით ხისას და მით უფრო იშვიათად ალიზისას. სახლები ერთ სართულიანია და წინ ყველას აივანი აქვს. სახლი ჩვეულებრივ ორის ოთახისაგან შესდგება, ერთი დიდია და ფართო, რომელშიაც მოთავსებულია მთელი ოჯახი, და მეორე პატარა, რომელიც ჩვეულებრივ სტუმრებისათვის აქვთ დატოვებული. ოთახები უიატაკოა. ფიცრის გაკვრა იატაკზედ არ იციან და მდიდარია თუ ღარიბი, ყველას მიწის იატაკი აქვთ. სახლებს კედლებში ჩვეულებრივ ფანჯრებს არ ატანენ, ჯერ საინგილოში არ არის შემოსული ფანჯრების ჩატანება და მხოლოდ მდიდარ შეძლებულებთან თუ შეხვდებით ფანჯრებიან ოთახებს. მის მაგიერობასა სწევს პატარა, სრულიად უმნიშვნელო სარკმლები, აქა-იქ დატანებული, რომელნიც საკმარისს სინათლეს ვერ იძლევიან და სახლში მუდმივი სიბნელია. ამ სარკმლებს შუშის მაგიერ ფიცრის მისახურები აქვთ აფარებული, რომელნიც დღისით იღებიან. ოთახში გამუდმებულ სიბნელისა გამო ზამთარ-ზაფხულ სახლის კარ-ფანჯარა ღიაა დღისით. ბუხრებსაც არ აკეთებენ დიდს ოთახებში ინგილოები. ცეცხლი ჩვეულებრივ შუა ოთახშია გაჩაღებული და ბოლი პირდაპირ აყარში ადის, საიდგანაც ნელ-ნელა ქუჭრუტანებიდგან გადის გარედ აქეთ-იქიდგან. შუა ცეცხლისთვის ზამთრის ცივ დღეებში შეათრევენ ხოლმე ხის დიდს ბოძებს, მოუკიდებენ ცეცხლს და ნელ-ნელა ნებივრად სწვავენ. შუა ცეცხლთან იკრი-

ბება მთელი ოჯახი, დიდი, პატარა და ყონაღად (სტუმრად) მოსული ხალხი. ყველანი ჩამოუსდებიან აგიზგიზებულს ცეცხლს, თბობენ გაცივებულს სხეულს და თან მასლაათობენ, ბაასობენ და უამბობენ მოხუცთაგან გაგონილს ძველს ამბებს ლეკ-თათართა ბატონობის დროისას. ასეთი თემები დაუსრულებელია, მრავალ-გვარია და შიგ გამოიხატება ინგილოთა გმირობა და ვაჟკაცობა ურიცხვ მტრებისაგან თავის დაცვის დროს, როცა პირქუშნი ლეკნი პარპაშობდნენ მთელის საუკუნოების განმავლობაში საინგილოს მიწა-წყალზედ. ბევრი გამოვლილი ჭირ-გარამი არის ჩაქსოვილი ამ ამბებში, ბევრი ნაღველითა და ბოღმით არიან შეზავებულნი ამ ურიცხვ მტერთან ბრძოლის მოთხრობანი. ყველა ამას ინგილო ზამთრის ცივს დღეებში გიზგიზა ცეცხლის წინ იგონებს და უამბობს ახალგაზრდობას.

სახლში ვერა ნახავთ ტახტსა და სხვას მის მიწაგარს. ინგილოები პირდაპირ მიწაზედ იშლიან ლოგინსა და ისე იძინებენ, მთელს აქაურს ლოგინს ჯეჯიმები შეადგენენ, რომელნიც მრავლად მოიძებნება ყველა ოჯახებში. სურათებიანსა და ათასფერად აჭრელებულს ჯეჯიმს ქვეშ გამოკრული აქვს სქელი და მაგარი მოთელილი ნაბადი. ამ გვარს ჯეჯიმს ინგილო ზოგს ქვეშით იგებს და ზოგს ზევიდამ იხურავს. მუთაქები საინგილოში სრულიად მიღებული არ არის, ხმარობენ მხოლოდ ბალიშებს, რომლებშიაც ბუმბულის მაგივრად მატყლსა ჰყრიან და რომლებსაც **სასთულს** ეძახიან.

სახლის კედელში თაროები არის გაკეთებული, რომელზედაც ყოველთვის დაკრიალებულ-დასუფთავებული სპილენძის ჭურჭელი არის ჩამომწყრივებული. წინეთ თაროები არ იცოდნენ, მის მაგიერ ორი ფიცარი იყო მიმაგრებული ერთმანეთზედ ირიბად და ამათზე ეწყოა ჭურჭელი, რომელსაც **კორთეს** ეძახდნენ, ესევე აკეთებდნენ ფიცრებისაგან გძელს ტახტს, წალოს მაგივრად, რომელსაც **დიჩას** უძახდნენ. სპილენძის ჭურჭლისა და ჯეჯიმების რაოდენობით გაიზომება ინგილოს სიმდიდრე. რამდენადაც ინგილო უფრო მდიდარია, იმდენად უფრო მეტი ჭურჭელი და ჯეჯიმები აქვს. ხშირად კედელში გაკეთებულ თაროებზედ იმდენი კოხტად დაკრიალებული და მოკალული ჭურჭელი არის ხოლმე ჩამწყრივებული, რომ ზოგს მექვამებს არც კი ექნება თავის დუქანში ამდენი. ინგილოს ჭურჭელის სიმდიდრით თავიც მოაქვს და სატრახბოდაცა აქვს განდილი.

დიდი ოთახი, სადაც მთელი ოჯახი არის მოთავსებული, ხშირად ძალიან უსუფთაოდ არის და კვამლით გაჭვარტლულია მისი კედლები და ჭერი. არავითარი მორთულობა არ მოიპოვება ინგილოს სახლში; გარდა **მარაზისა**, რომელიც თან და თან ხმარებიდგან გამოდის. მარაზი ფერადის ძაფებისაგან მოქსოვილ-დაგრებილ თოკის მინაგვარია, რომელ-

საც ყოველ თითო გოჯის სიშორეზედ ფერადის ძაფებისაგანვე გაკეთებული მომცრო ბურთები ჰქონია. ამ მარაზს კედლებზედ ავლებენ ჭერის სი-ახლოვეს რამდენიმე პირად მთელს ოთახს. მარაზი და კედლებზე რამდენიმე ადგილას ჩამოკიდებული პურის სავარცხელი, რომელიც თავთავებისაგან ოთხკუთხად მოქსოვილს რასმეს წარმოადგენს, არიან მთელი მორთულობა ინგილოს სახლისა.

სადილს ინგილოები ძირს იატაკზედა სქამენ, გაშლიან ჯეჯიმს, დააწყობენ ხონჩებზედ საჭმელსასმელს და შემოუსდებიან ყველანი. მხოლოდ ეს კია მტკიცედ დაცული, რომ ქალები და კაცები ერთად არ დასხდებიან არას დროს, გინდა დაძმანი ან ცოლ-ქმარნი იყვნენ, ცალკე უნდა სქამონ კაცებმა და ცალკე ქალებმა.

უფრო სუფთადა აქვს შენახული ინგილოს პატარა ოთახი, რომელშიაც სტუმრებს მოათავსებენ ხოლმე. აქ ხშირად პატარა მაგიდაც მოიპოვება და პატარა ტახტიც. ამ ოთახშივე ნახავთ ბუხარს, რომელიც ძველად საინგილოში სრულიად არ იცოდნენ.

სახლში, ან მის აივანზედ ნახავთ ხის უშველე-ბელს კასრებს. ეს კასრი ხის მორს წარმოადგენს, რომელიც შიგნიდან გამოუგულივით-გამოუთლიათ და პურისა და სხვა რამ ხორბლის ჩასაყრელად გაუხდიათ.

ინგილოთა შუაგულს სოფელში ვერსად დაინახავთ კალო-საბძელს. საბძლები ხომ სრულიად არ იციან ინგილოში მის, მაგივრობას ბოსლის და სახლის აყარი სწევს. კალოები კიდევ ყველას სადმე სოფლის განაპირა ადგილებში აქვთ მოთავსებული, სადაც განიავების დროს საჭირო ქარიც კარგად მოდის და არც სოფელს აჩეჩიანებენ და აფუჭებენ.

დიდი მნიშვნელობა აქვს ინგილოთა სოფლის ცხოვრებაში ესრედ წოდებულს ბინებს. ბინები თითქმის ყველა სოფლებსა აქვთ, მეტადრე რიცხვ-მრავალ სოფლებს, რომელთაც ხშირად ათი-თხუთმეტი ბინა აქვთ. ბინა მეორე სახლ-კარია ინგილოსი. იმ სოფლებს, რომელთაც ადგილობრივ ცოტა მამულები აქვთ და არა ჰყოფნით, ისინი ძველიდგანვე წასულან სოფლიდგან, გაუჩენიათ სადმე უღრანი ტყეები, ახოებად უქცევიათ და უხნავ-უთესნიათ. ბინებზედ ინახავენ საქონელს, რადგანაც იქ უფრო ბევრი და უხვი საკვებია, ვიდრე თვით სოფლებში, აქვე აქვთ სახნავ-სათესი მამული და ზოგჯერ ვენახებიც. ბინაში ოჯახობა გამუდმებით არა სცხოვრობს, არამედ უფრო ზაფხულობით, ხშირად კი ასე შვრებიან, თუ ოჯახი დიდია, ჯერ-ჯერობით მიდიან ბინაში, ჯერ ერთი წავა ბინაში იმუშავენს განსაზღვრულს დროს, იცხოვრებს იქ და მერე ბრუნდება სახლში და მის მაგიერ სხვა წევრი ოჯახია მიდის. ბინაში ზოგნი ისეთებიც არიან, რომელთაც სოფელში არაფერი არ აქვთ და მხოლოდ ბინით ირჩენენ

თავსა. შემდეგში დროსა ღ ხნის განმავლობაში, როცა ხალხი გამრავლდება სოფელში, მაშინ ბინა მუდმივ საცხოვრებლად იქცევა ხოლმე და ცალკე სოფლად გამოიყოფა. ამ გვარად გაშენებულან მრავალნი სოფლები საინგილოში.

დასასრულ, არ შეიძლება ორიოდ სიტყვა არა ვსთქვათ სასაფლაოებზედაც. აქაური სასაფლაოები ნამდვილ ოსმალეთის სასაფლაოებს მოგაგონებენ. ყოველივე მიცვალებულის საფლავს თავში ურჭვია უშველებელი ბრტყელი სალი კლდე. რამდენადაც სოფელი მთის სიახლოვეს მდებარეობს, რიცხვი და სიდიდე ამ სასაფლაოს ქვებისა მატულობს და ხშირად ნახავთ მთელის საყენის სიმაღლესაც. ალაზნის პირის სოფლებში კი, სადაც ეგრე ადვილი არ არის ქვების შოვნა, დიდი ხის გრძელს ბოძებსა სთლიან, ბრტყელს ქვას წარწერებით ზედ ამაგრებენ და საფლავის თავში არჭობენ. საყურადღებოა ინგილოთა პატივისცემა სასაფლაოებისადმი. სასაფლაოები ძალღუმადურად დაღვთის ანაბარად კი არა აქვთ მიტოვებული, არამედ ყურადღებით ექცივიან მას და ჰპატრონობენ. ყველა ინგილო მოვალეობათა სთვლის თავის მკვდრის საფლავი ხეებით შეამკოს და ყოველმხრივ გაამშვენებოს, ამიტომ ყველა სასაფლაოები ხეებით არიან სავსენი. სასაფლაოებს რომ გაჰხედოთ, შორიდგან ტურფა რამ წალკოტი გეგონებათ, ან უზომოდ ატეხილი ხშირი ტყე, სადაც ურიცხვი ხეები ერთმანეთს გაზრდას ეჯიბრებიან და მხოლოდ ახლო რომ მიხვალთ, მაშინ შეამჩნევთ, რომ სასაფლაოსთანა გაქვთ საქმე. სასაფლაოზედ ხშირად იზრდება ეკალი, ძეძვი და მაყვალი და ისე გააპარტახებს და გაავერანებს ხოლმე ყველაფერს, რომ კაცს გავლა არ შეუძლიან. ამიტომ ინგილო დრო-გამოშვებით მისდგება ხოლმე ამ სასაფლაოების დამაუშნოებელსა და გამოუსადეგარს ბუჩქნარებს და სრულიად ამოაგდებს ხოლმე: გარდა ამისა მუსულმან ინგილოებში გავრცელებული არის კერძო სასაფლაოები, ყოველივე გვარს და ხშირად ოჯახს საკუთარი სასაფლაო აქვს რისთვისაც არჩეული აქვთ საუკეთესო ადგილი ბაღში, ან მახლობელ მამულში, ან იქვე, სახლის გვერდით. სასაფლაოზედ ხის მოჭრა სამარცხვინოდ ითვლება და ვიდრე ხე თითონ არ გახმება და ჩამოლობება, ხელს ვერავინ ახლებს.

ზ. ელილი.



მეზია.

—:—

ერი—დიდად რთული მოვლენაა, იმას აქვს ბევრნაირი სხვა და სხვა მხარე, ბევრნაირი მომენტები თავის ცხოვრებისა და განვითარებისა; იგი

ჰსუნთქავს და მოძრაობს; როგორც ცოცხალი არსება, მისი ძარღვები სცემს და მიმომდინარებს მისი დამატებული ცხოვრებითი ძალა.

გინდათ მიეშველოთ ამისთანა ხალხებს, ამისთანა უზარმაზარ ცხოველს?—თუ გინდათ, საქირო არის თავგანწირული ბრძოლა და მუშაობა, მარტო ერთ ალაგას კი არა, არამედ ყველგან, სადაც კი მოითხოვს საქიროება, ყველგან, სადაც კი სცემს რაიმე ძარღვი ამ დიადი ცხოველისა.

აგრე მოიქცენ ჩეხებიც.

მათ ისტორიაში შესანიშნავია ორი უმთავრესი ხაზი თავგამოდებული ბრძოლისა. ერთი ხაზი—ჩეხის: გარე სდევს და იკვანძება ვენაში. ეს გახლავთ ბრძოლა მართველობის ან ავსტრიის საიმპერიო უფლების წინააღმდეგ. თუ ეს საიმპერიო უფლება თვითონ წინააღმდეგია ჩეხის თავისუფლებისა და მისი განვითარებისა, თუ თვითონ გაიძახის, რომ ავსტრია ერთი განუყოფელი სახელმწიფოაო და მთელს იმპერიას უნდა განაგებდეს ერთი საიმპერიო კანონმდებლობაო, რასაკვირველია, პირველი მტერი ჩეხის აღორძინებისა აქ ყოფილა და აქ იყო — ვენაში, იმ უმაღლეს საკანონმდებლო საკრებულოში, რომელსაც რეიხსრატი ჰქვია.

მეორე ხაზი—გარს უფლის თვითონ ჩეხისა და შეეხება თავგანწირულ ბრძოლასა და მუშაობას შიგნით, ხალხში. ეს ასპარეზი უფრო ვრცელია და მრავალფერი. ეს მეორე განვიხილოთ. ჯერ კი გავშინჯოთ პირველი ბრძოლა პოლიტიკურ ცენტრის წინააღმდეგ.

ერთს ჩემს წერილში უკვე ნახსენები მქონდა, რომ 1867—1868 წლებში ჩეხის დებუტატებმა უარჰყვეს რეიხსრატი და გამოაცხადეს კიდევ: ჩეხიას უნდა მიენიჭოს თავისი კერძო და დამოუკიდებელი რეიხსრატის. დებუტატები ვენაში არ წასულან და არ მიუღიათ მონაწილეობა რეიხსრატის საკანონმდებლო მუშაობაში. აქედან იწყება, ეგრედ წოდებული, **პასსიური ოპოზიცია**, რომელსაც ესეთი (შედარებით) დიდი ქვეყნისთვის, როგორც არის ჩეხია, აქვს და ჰქონდა კიდევ თავისი მნიშვნელობა. ჩეხია თითქმის ერთს მესამედს შეადგენს მთელი ავსტრიის იმპერიისას. ამისთანა ქვეყნისათვის, რომლის წარმომადგენლობა 120—130 პირამდე აღის, პასსიური პოლიტიკა ხელსაყრელი გამოდგა. უმაღლესმა მმართველობამ თვითონ შეიგნო, რომ მუდმივი შინაური უკმაყოფილება სასიკეთო არ იყო, და ცოტა არ იყოს, შესცვალა თავისი პოლიტიკა ჩეხების მიმართ.

1871 წელს ბოჰემიის ლანდტაგმა შეიმუშავა კიდევ „ძირითადი პარაგრაფები“ ამ დიადი შინაური დავისა და უკმაყოფილების მოსარიგებლად. იქ მოთხოვნილი იყო სამეფოებრივი თავისუფლება ჩეხისა და დაგვირგვინება იმპერატორისა წმ. ვაცლავის გვირგვინით.

საქმე ისე ჩაიშალა, „ძირითადი პარაგრაფი“ უბრალო მოთხოვნებზედ დარჩა და ჩეხიის პარტი-ოტები — პირში ჩალა-გამოვლებული.

მაშინ დიდმა უსიამოვნებამ იჩინა თავი თვითონ ჩეხების შორის. დაიბადა მთელი პარტია „ახალგაზრდა ჩეხებისა“, რომელმაც მოითხოვა გადათვლიერება და გამოცვლა მიღებულ ტაქტიკისა. „პასსიურმა ოპოზიციამ“ — ამბობდნენ ივინი — ჩვენ არ მოგვიტანა არავითარი სარგებლობა; საჭირო არის ჩეხიამ მიიღოს მონაწილეობა იმპერიის კანონმდებლობაში იქსამკვდრო-სასიცოცხლო ბრძოლა გამოუცხადოს უმთავრეს მტერს — ცენტრალიზმსაო“. ამ ქადაგებას თავიდან, სანამ ცოცხალი იყო უმთავრესი ლიდერი „ძველი ჩეხებისა“ (პალაკვი), დიდი გავლენა არა ჰქონდა, მაგრამ მისი სიკვდილის შემდეგ, როცა ეროვნულ მოძრაობის სათავეში ჩაღვა ცნობილი რიგერი, ჩეხებმა გამოსცვალეს ტაქტიკა „პასსიური ოპოზიციისა“.

ამ ნაირად ჩეხები შევიდნენ ვენის რეიხსრატში. ლოლიკურად აქ წინააღმდეგობა იყო. მაგრამ რეალურმა ცხოვრებამ ყველას ნათლად დაანახვა, რომ მარტო განყენებული ლოლიკით შეუძლებელია იხელმძღვანელოს ყოველთვის კაცმა, რომ ზოგჯერ პატარ-პატარა, მაგრამ რეალურ ცხოვრების მოთხოვნებზედ დიდი მნიშვნელობა აქვს ხოლმე. ეს თვითნათლად დაამტკიცეს ჩეხებმა. შევიდნენ რეიხსრატში თუ არა, ჩეხიის დებუტატებმა თავდაპირველად გამოაცხადეს, რომ ივინი, ამ თავის მოქმედებით, უარს კი არა ჰყოფენ ჩეხიის სახელმწიფოებრივ უფლებებს. ამ დეკლარაციის შემდეგ შეუდგენ წვრილმან მუშაობას და ავსტრიის რეიხსრატს გამოჰკლიჯეს ისეთი კანონები, რომელთაც დიდი მნიშვნელობა ჰქონდა ჩეხიის ეროვნულ მოძრაობაში; ასეთია, მაგალითად, კანონი ენის შესახებ: ჩეხური და გერმანული ენა გათანასწორობებული იქნა სასამართლოებში საქმეთა გარეგან წარმოებაში (კანცელარიაში კი არა); პრაპში უნივერსიტეტი გაყოფილ იქნა ორ ნაწილად, ერთი — გერმანული, მეორე — ჩეხური, და ამნაირად დაიწყეს ორი საუკუნის წინ შემწყდარი ლექციების კითხვა ჩეხურ ენაზე. ამისთანა კანონები ბევრი იყო მიღებული; ყველას აქ ვერ ჩამოვთვლი, მაგრამ საზოგადო ხასიათი ამ კანონიერებისა ის იყო, რომ ყველა ცხოვრების წვრილმან მოვლენას შეეხებოდა.

ამით ისარგებლეს „ახალგაზრდა ჩეხებმა“. ის პარტია, რომლის მეოხებით შეწყდა „პასსიური ოპოზიციისა“ და დაიწყო აქტიური პოლიტიკა, ეხლა წინააღმდეგი იყო ამ აქტიური პოლიტიკისა. „ამისთანა პოლიტიკა — ამბობდნენ ივინი — ხალხს ატყუებს და თანდათან აძინებს; ხალხს ჰგონია, თითქო რასმე აკეთებენ მისი დებუტატები და სინამდვილით კი მათი შრომისაგან არა გამოდის რაო; ხალხსა თვალი რჩება იმათ წვრილმან მოქმედებაზე,

და სრულებით ავიწყდება უმთავრესი ეროვნული მოთხოვნები. ამნაირად ცენტრალიზმი უფრო მაგრდება, უფრო ფეხს იდგავს და უფრო დაძაბული პავს ჩვენს ქვეყანასაო“.

ამ ქადაგებაში დიდი სიმართლე იყო. ცენტრში მუშაობა, — მაგალითად, რუსეთში სახელმწიფო სათათბიროში, — სასურველია მხოლოდ იმდენად, რამდენადაც იქაური ტრიბუნა საჭირო არის უმთავრესის ძირითადის მოთხოვნებების გამოსაქვეყნებლად. ეს ტრიბუნა უშველებელ სამრეკლო სა ჰგავს, საიდანაც ზარის ხმა გაისმის მთელს იმპერიაში, მაგრამ თუ ამ ცენტრალურ დაწესებულებაში დაჩაგრულ ერების წარმომადგენლები შეუდგებიან ყოველ-დღიურ და წვრილმან საკითხების გადაწყვეტას, მაშინ ხალხის ყურადღება იმ ცენტრისაკენ იქნება მიქცეული, მაშინ ყოველი ერი იმ ცენტრიდან მოელის ყოველ საჭიროების გადაწყვეტას და დაკმაყოფილებას. ე. ი. მაგრდება ცენტრალიზმი და ნელ-ნელა იმარბება ყოველი ეროვნული აღორძინება. ეს კარგად აქვს შეგნებული ყოველ მმართველობას და სწორედ ამიტომ, თითქმის ყველგან, სახელმწიფო არჩევითი უფლება უფრო ვრცელია, ვიდრე ადგილობრივი. მაგალითად, მუშებს ნება აქვთ მიიღონ მონაწილეობა სახელმწიფო არჩევნებში, და ნება არა აქვსთ სამოქალაქოში, ქალაქის საბჭოს ხმოსნების ასარჩევად; ჩვენი გლეხები ეხლა თავის წარმომადგენელს ჰგზავნიან სახელმწიფო სათათბიროში და იმავე დროს ადგილობრივად ერობაც კი არა აქვთ, მაშასადამე, არც რაიმე არჩევითი უფლება.

აი სწორედ ამიტომ გამოილაშქრნენ „ახალგაზრდა ჩეხები“. ხალხმა მათ მხარი დაუჭირა და 1890 წ. არჩევნებში ისე გაიმარჯვეს, რომ ერთი „ძველი ჩეხი“ არ გასულა დებუტატად.

ამ დამარცხების მიზეზთა შორის ერთი საგულისხმიერო მოვლენა არის. „ძველ ჩეხების“ და მმართველობის შორის ჩამოვარდა მორიგება შესახებ ჩეხიის ეთნოგრაფიულად გამოყოფისა. საქმე იმაშია, რომ ჩეხიის განაპირა ადგილები გერმანელებს უჭირავთ. იმ მორიგების თანახმად ეს ადგილები უნდა გამოეყოთ ჩეხიის ტერიტორიიდან. სწორედ ამან ასტეხა საშინელი აურზაური და გამოიწვია საშინელი დამარცხება „ძველი ჩეხებისა“. სჩანს, დიდად განათლებულ და გონებით მაღლა მდგომარე პირებმა ვერ შეიგნეს და ვერ გაითვალისწინეს ის, რაც აგრე მკაფიოდ გადასწყვიტა ერის ინსტინქტიურმა მოძრაობამ. ეხლა სახელმწიფო მეცნიერება ამტკიცებს, რომ ეთნოგრაფიულად ხაზის გასმა სამეფოებრივი ტერიტორიისა შეუძლებელია და ერის უფლებასთან შეუხამებელი. ამ აზრს, მე მგონი, დამტკიცება არ უნდა და, თუ კი უნდა, საქართველო წარმოადგენს უკეთეს საბუთს. თუ ეთნოგრაფიულად შეიძლება მისი ტერიტორიის დაქუცმაცე-

ბა, აშკარაა, იმას უნდა ჩამოეჭრას ბორჩალო მხოლოდ იმიტომ, რომ იქ უფრო თათრები და სომხები სცხოვრობენ, ვიდრე ქართველები; უნდა ჩამოეჭრას თვითონ მისი დედა-ქალაქი თბილისი... ე. ი. ცოცხალ ორგანიზმს უნდა მოეჭრას თავი! სწორედ ამისთანა სისულელედ მოეჩვენა ჩეხიის ერს მისი ტერიტორიის შემცირება და ერთის გმირულის დაბერვით გადააყენა პოლიტიკური ასპარეზიდან ის შვილები, რომელნიც აგრე მხატვდ მოეპყრენ ეროვნულს ინტერესებს.

პოლიტიკური ხელმძღვანელობა გადავიდა, ახალგაზრდა ჩეხების“ ხელში.

გ. გვაზავა.



მ თ ა

ინტელიგენციის სამსჯავროს წინაშე.

—;—
(დასასრული)

ერთი სიტყვით, თუმცა თემობის დროს ზოგიერთ შემთხვევაში მამა-კაცი და დედა-კაცი ადვილად იკლავდა სქესის წყურვილს, მაგრამ ხხვა დროს თემი სასტიკად ექცეოდა ყველას, ვინც-კი დაარღვევდა სქესის ეთიკას. წარმოუდგენელი რამ იყო მაშინ ნათესავების შეუღლება. შეუბრალებლად ექცეოდა თემი ცოლქმობაში მოღალატეს, ვინაიდან, რადგან ოჯახი წყარო იყო ახალთაობისა, თემი თავის ამ შეხედულებას სისტემატიურად ახორციელებდა ცხოვრებაში, და ამას ხედავდა ყოველი მთიელი. თემი ამბობდა: სანამ ერთად ცხოვრობთ, ღალატი შეუძლებელია, და თუ ერთად ვერ თავსდებით, ნება გაქვთ, თავთავიანთი გზა მონახოთ...

თემის აი ამ პირობებში გაიზარდა მაყვალა. მაყვალამ კარგად იცოდა, რა თვალით უყურებდა თემი ოჯახის მოღალატეს; ვამბობ ოჯახის მოღალატეს და არა ქმრისას, რადგან თვით თემი ამგვარ საქციელს ოჯახის ღალატს უწოდდა. ეს მართალიც იყო. ოჯახის დარღვევას ხშირად მოსდევდა ქონების გაოხრება, შვილების უპატრონოდ დატოვება. ამ შემთხვევაში ბავშვები გადადიოდნენ გვარეულობის ხელში და მკითხველი ადვილად წარმოიდგენს, რა მდგომარეობაში ჩაცვივდებოდნენ ეს პატარა ადამიანები... თემი და ოჯახიც გამოცდილი იყო ამისთანა ამბებში, ამიტომაც დაულაღავად ცდილობდა, მოესპო სქესთა შორის თავისუფლება. მაყვალამ დაარღვია თემის და ოჯახის საუკეთესო ტრადიცია მაშინ, როდესაც შეეძლო გასცლოდა თავის საძაველ ცოვრებას. ვინაიდან მაშინდელი მთიელი ძლივს-ძლიობით თავიდან იშორებდა სქესთა ნდომის სიადვილეს, მაყვალას ყოფა-ქცევა მეტად სამძიმო უნდა ყოფილიყო თემისა და ოჯახისათვის; და თუ მკითხველიც დამეთანხმება, რომ სქესთა შორის

რის თავისუფლების მოსპობა პროგრესიულ მოვლენად უნდა ჩაითვალოს, მაშინ მაყვალის დანაშაული უფრო აშკარად უნდა დაინახოს ვიდრე ახლა.

დღევანდელი მანდილოსანი—თუ-კი მას პატიოსნება და ნამუსი შერჩენია—არ ინდომებს ქმრის ხელში საყვარლის აჩენას. ამგვარი მანდილოსანი თავის ოჯახში ტანჯვას იტანს, ქმარს ვერ სტოვებს მხოლოდ იმიტომ, რომ დღევანდელი სოციალური წეს-წყობილება ხელს არ უწყობს მას ამ საქმეში. დღეს რომ ცოლ-ქმრობის დაშორებას ისევე უყურებდნენ, როგორც ალ. ყაზბეგის გმირების დროს, ბევრი ქალი თავს დაანებებდა თავის ქმარს და ცხოვრების უკეთესს პირობებში ჩადგებოდა. ამ შემთხვევაში ალ. ყაზბეგის მაყვალა უფრო კარგ პირობებში ცხოვრობდა, ვინემ დღევანდელი მაყვალა. დღევანდელ მაყვალას გულით და სულით ენატრება თავის წინაპარ მაყვალას მდგომარეობა ქორწინების საქმეში. დღევანდელ მაყვალას სრული საბუთი აქვს უსაყვედუროს იმ მაყვალას, რათა მან შეურაცხყო თავისი მანდილი. დღევანდელი მაყვალა ეუბნება იმ მაყვალას: ხომ შეგეძლო წასვლა, რატომ თავს არ უშველე, რად აიხადე ნამუსი, და ეს სირცხვილი მე რად მიანდერძე....

ასე, თუ ისე, მაყვალას საქციელი არა თუ თემობრივ წეს-წყობილების პირობებში, არამედ დღევანდელ სოციალურ ცხოვრების მიხედვითაც, ყალბი მოქმედებაა.

ამიტომ მაყვალა დამნაშავეა იმაშიაც, რომ ქმრის ხელში აიჩინა საყვარელი.

თუმცა არსებითად ჩემგან განზრახული საქმე დამთავრებულად მიმაჩნია, მაგრამ მაინც საჭიროდ ვრაცხ, გაკვირით მაინც, თვალი გადავაგლო იმას, რაც მოხდა ქართულ თეატრის სცენაზე.

პირველი სიტყვა წარმოსთქვა ბრალმდებელმა. ბრალმდებელმა თუმცა დანაშაულად ჩაუთვალა მაყვალას ორივე შემთხვევა მის ცხოვრებაში, მაგრამ თავისი აზრი ვერ დასაბუთა საკმარისად: მან ვერც ჩვენი ცხოვრებიდან ამოღებულ ფაქტებით ისარგებლა და მის სიტყვებში არც სისტემა იყო. ბრალმდებელს ეტყობოდა სრული მოუმზადებლობა...

უფრო საინტერესო იყო დამცველების სიტყვები. პირველმა დამცველმა დიდ ხანს ილაპარაკა; მისი სიტყვა—თავის თავად რომ ავიღოთ — შინა-არსიანი იყო და არც შნო აკლდა. მაგრამ მის სიტყვაში გატარებული იყო იმისთანა აზრები, რომელნიც ხსნიდნენ ცოლ-ქმრიანობის ცხოვრებას ზოგადად. მის წინ იყო წამოყენებული განსაზღვრული მოვლენა, რომელსაც ადგილი ჰქონდა ისტორიულ განსაზღვრულ პირობებში: ეს ამბავი მოხდა ჩვენ მთაში მე-19 საუკ. დასაწყისში. დამცველს ნათელ უნდა ეყო მაშინდელ მთიელის ცხოვრება და აქედან უნდა დაენახებინა საზოგადოებისათვის თავის კლიენტის სიმართლე ან დანაშაული. ზოგადის

მსჯელობის წინააღმდეგ არა მაქვს-რა, ოღონდ იქნას შესრულებული ერთი პირობა: ზოგადი დებულება, პრინციპი საკმარისად უნდა ასაბუთებდეს კერძო მოვლენას. დამცველის სიტყვაში მე ეს ვერ დავინახე; მისი მოსაზრებანი არ ეხებოდნენ ჩვენი მთის წეს-წყობილებას, მთიელის ცხოვრების ფაქტებს. ამ მხრივ რომ მისი სიტყვა დავაფასოთ, დავინახავთ, რომ მისი ნალაპარაკევი დროისა და სივრცის გარეშე დარჩა. ვამბობ ამას იმიტომ, რომ ამ დამცველს შეეძლო წარმოეთქვა თავისი სიტყვა ქალთა „სიიზდ“-ზედ რუსეთში, სუფრაჟისტების კრებაზე ინგლისში და, თუ გნებავთ, გოტენტოტ-ბუშმენ-ზულუსების თემებში აფრიკაში, ვინაიდან მის სიტყვას ერთი-და-იგივე მნიშვნელობა ექნებოდა ყველგან. დამცველმა, როგორც სჩანს, საგნად აიღო ეგრედ წოდებული „ქალთა საკითხი“, რომლის დასაბამი—თუ არა ესცდები—ჩამარხულია პატრიარქულ ოჯახის დასაწყისში... დამცველის სიტყვა ასცდა თავის მიზანს. როდესაც დამცველმა დაიწყო ლაპარაკი გელაზე და მაყვალაზე, აქაც კი ვერ მიუახლოვდა თავის საგანს. აქაც ზოგადი ხასიათი მისცა თავის სიტყვას, თითქოს ინგლისელი ცოლ-ქმარი, რუსი ცოლ-ქმარი და ქართველი მთიელი ცოლ-ქმარი ერთ-და-იმავე პირობებში მოქმედებდნენ, ერთ-და-იმავე საზომით იზომებოდნენ მათი ყოფა-ქცევა, თითქოს განსაკუთრებულ პირობებს განსაკუთრებული ცხოვრება არ შეეფერებოდნენ და აქედან თავისებური საზოგადოება და თავისებური პიროვნება არ არსებობდეს... მიუხედავად ყველა ამისა, დამცველის სიტყვაში შევნიშნე ერთი საინტერესო და ახალი-რამ. თავის ზოგადმა მოსაზრებამ ისე გაიტაცა დამცველი, რომ თითქმის მთელი საქართველოს ოჯახობა საროსკიპო სკამზე გამოიჭიმა. თუ ქართველის ოჯახს ამის მეტი უნარი არა ჰქონდა, მაშ როგორ-ღა იცოცხლა მრავალ საუკუნოების განმავლობაში, შექმნა მატერიალური და გონებრივი კულტურა და დღესაც,—მისთვის შავ-ბნელ დროში,—იმედს არა ჰკარგავს, რომ მოვა დრო და მისთვისაც დადგება ეროვნული კეკლუცი გაზაფხული... ან არა და, განა „ზოგად“ მაყვალას გამართლებისათვის ამ გვარი დასკვნა საჭირო იყო?!..

მეორე დამცველმა მოიყვანა რამდენიმე საბუთი მაყვალას საქმის გამოსარკვევად. მის ბასტილიას რომ თავი დავანებოთ, ვინაიდან ამ სიმაგრის აღება არც თუ ისე ძნელი ყოფილა, როგორც დღეს უკვე გამოირკვა ეს ამბავი და თუ იმასაც მივიღებთ სიმართლედ, რომ ფრანგი ხალხის თავისუფლება ამ სიმაგრეში კი არ იყო ჩამარხული, არამედ თვით საფრანგეთის ხალხში, მაშინ ამ დამცველის სიტყვაში დარჩება ორი უმთავრესი საბუთი. დამცველმა ეკლესიას შეათარა თავი, აღნიშნა-რა ეკლესიის ღვთაებრივი გავლენა ადამიანზე ჯვარის წერის დროს. დამცველმა აგრეთვე სიმაგრედ მოიზღუდა რუსის კა-

ნონი, განმარტა-რა, თუ რა ღრმა ცვლილებას ახდენს უცხო კანონი ამა თუ იმ ხალხის ცხოვრებაში, ვაქცევ მკითხველის ყურადღებას ამ ორ საბუთს იმიტომ, რომ როგორც ეკლესია, ისე რუსის მთავრობის კანონი ფაქტორია ჩვენი ცხოვრებისა. რაც შეეხება ეკლესიის და სანთლების გავლენას საზოგადოდ ადამიანზე, — ეს მოვლენა არსებობს, ამას უარს ვინ ჰყოფს, მაგრამ კათხვა ამაში არაა. დამცველს აი რა უნდა გამოერკვია: მთიელის ცხოვრებაში ჩვეულებრივ ქართულ ეკლესიას მნიშვნელობა ჰქონდა, თუ არა, და თუ ჰქონდა, რა ხასიათისა? უნდა ვაუწყო მკითხველს, როგორც ჭეშმარიტება, რომ მაშინდელ მთიელს ეკლესია, სანთელი და მღვდელი მეტად ნაკლებად სწამდა. მთიელის რელიგიურ მოთხოვნილებას საფუძვლით აკმაყოფილებდა ხევის ბერი, დეკანოზი, დასტური... ქორწინებას საზოგადოდ ხევის ბერი ან დეკანოზი ახდენდა იმ დროს. ასე რომ, ეგრედ წოდებულ მართლმადიდებელ ეკლესიას ძლიერ მცირე გავლენა უნდა ჰქონოდა მაყვალაზე. მაყვალას არც მღვდლისა, არც ეკლესიისა და არც სანთლების (ვგონებ, ღამეც იყო) არ ეშინოდა. მაყვალა ცოლ-ქმრობის გაყრის საქმეში ეკლესიას არ ეხატრებოდა. ეკლესიის გავლენა მთიელზე, ეს ოვით დამცველის საკუთარი ფანტაზიაა, ზღაპარია... დამცველს დაემართა ის, რაც ბელეტრისტ მაქსიმ ბელინსკის რუსეთში. ამ მწერალმა ერთ-ერთ თავის მოთხრობაში ასწერა აღდგომის ღამე, როგორც მშვენიერი მთვარიანი ღამე. მკითხველი ამ სურათმა აღტაცებაში მოიყვანა. მაგრამ... ნ. მიხაილოვსკიმ აუწყა მკითხველს, რომ აღდგომის ღამეს მთვარე არასოდეს არ ამოდის! მკითხველი სახტად დარჩა!... ასევე გავოცდი მეც, როდესაც დამცველისაგან გავიგონე, ვითომ მაყვალა შიშისაგან კანკალებდა ეკლესიის, სანთლების და საზოგადოდ ქორწინების სხვა ატტრიბუტების და მანიპულიაციების გავლენის ქვეშ. ალბად თვით დამცველიც მაგრად ვერ გრძნობდა თავის თავს, როდესაც ამაზე ლაპარაკობდა... რუსის კანონი? იქნება სიმართლეს უფრო მიუახლოვდეთ, კანონის მაგიერ სიტყვა განკარგულება ვინმაროთ, ვინაიდან რუსის მთავრობა პირველ ხანებში მოქმედებდა ჩვენ ქვეყანაში ცირკულიარებით, დებულებით, საზოგადოდ—განკარგულებით. მაგრამ მივიღოთ სიტყვა კანონი. ამ კანონს, რასაკვირველია. გავლენა ჰქონდა ჩვენ ცხოვრებაზე და კერძოდ მთიელ ხალხზედაც. რუსის კანონს პირველ ხანებში მეტად მცირე ცვლილება უნდა მოეხდინა ჩვენ ცხოვრებაში, მეტადრე მთიელთა წეს-წყობილებაში. რუსის კანონი იმ ხანებში შინაურ ცხოვრებას თითქმის არ შეეხო. ეს ასეც უნდა მომხდარიყო: ახალი წესი ნელის ნაბიჯით იკაფავს ცხოვრებაში ადგილს, რადგან ახალსა და ძველს დიდი და ხანგრძლივი ბრძოლა აქვთ თვით-არსებობაზე. ამ ბრძოლას უფრო ადგილი აქვს მა-

შინ, როდესაც რომელიმე ქვეყანაში უცხო ერის წესები შემოაქვთ. ასე რომ რუსის კანონში არ უნდა ვეძებდეთ მაყვალას მოძმედების ახსნას.

მაშ, რაშია საქმე?

მე ზემოდ ვსთქვი, რომ თემი ირღვეოდა, უძლიერდებოდა; სამაგიეროდ ოჯახი თანდათან თავს ახწევდა თემობას და ძლიერდებოდა; ამ შემთხვევაში — თემობის და ოჯახის დავაში — ეჭვი არაა, რუსის კანონი მხარს დაუჭერდა ოჯახის მისწრაფებას. მართლა — და, რაში ეჭვნიკებოდა რუსის მთავრობას ჩვენი მთის ხალხის თემობრივი წეს-წყობილება, როდესაც მთელი რუსეთი და ბარის საქართველო ბატონ-ყმობის ქვეშ იხრწნებოდა. მაგრამ, ვიმეორებ, რუსის კანონს ამ ხანებში ჯერ-ჯერობით გავლენა არა ჰქონდა მთიელის შინაურ ცხოვრებაზე. როგორც ზემოდაც ითქვა, თვით მთიელთა ცხოვრებამ შექმნა ისეთი პირობები, რომლის წყალობით შესაძლებელი გახდა ოჯახის გამოცალკეება თემობიდან. რუსის კანონის ბევრად წინ, თვით საქართველოს საკუთარი მთავრობა შეეცადა, დაერღვია თემობა, რათა მისი ადგილი ცალკ-ცალკე ოჯახებიდან შემდგარ ჯგუფს დაეჭირა; ამრიგად, ფიქრობდა ჩვენი მთავრობა, უფრო ადვილად დაიმორჩილებდნენ მთას საქართველოს მეფეები და ჩვენი „ბრწყინვალე“ წოდება მგლურის თვალთ უყურებდა მთას; მთა ამათ ეჩოთირებოდათ, სძულდათ. ეს ასეც უნდა ყოფილიყო, ვინაიდან ჩვენი მთის მაშინდელი თემები დემოკრატიულ თვითმმართველობას წარმოადგენდნენ. ამავე დროს საქართველოს დიდი უმრავლესობა მონობის უღლის ქვეშ გმინავდა. ბარის ოჯახი, მისი ყოველი წევრი, მეფისა და მებატონის საკუთრებას შეადგენდა. პიროვნება სრულეობით შელახული იყო: ბარის ქართველთა ისე სარგებლობდნენ, როგორც კი მეფის და მებატონის ცხოვრება და სურვილი მოითხოვდა. სულ სხვა იყო მთა. უწოდებრივ, მჭიდროდ შეკავშირებული მთა თავს არ უხრია საქართველოს ბატონებს; ბევრჯელ წინააღმდეგობასაც უწევდა მთა. აქედან დაისკვნა მთის დამონავება. საქართველოს მეფეები შეუდგნენ კიდევ ამ საქმეს. პირველ ხანებში დაუნიშნეს მთიელებს მოხელეები — მოურავები. ამით აჩვევდნენ მთიელს ბიუროკრატიულ წესს, ანუ მორჩილებას. ჩვენმა მთავრობამ მთიელების დამონებაში მეორე ნაბიჯიც გადადგა. მოგვხსენებათ, ხალხის დამონებაში წოდებრიობას მეტად დიდი ადგილი უჭირავს. სოციალური ეს აქსიომა ჩვენ მეფეებსაც კარგად ესმოდათ. ამის გამო საჭირო იყო მთაშიაც შემოეღოთ წოდებრიობა, რის განხორციელებას შეუდგნენ კიდევ: მთიელთა შორის ზოგი-ერთი გვარები გაათარხნეს. აქედან აშკარად სჩანს, რომ თემობრივ წეს-წყობილების დარღვევას მოითხოვდა საქართველოს მაშინდელი პოლიტიკური მდგომარეობა. მაგრამ ამ პროცესის დაბოლოებას არ დასცალდა:

მოისპო ჩვენი პოლიტიკური თვითარსებობა და საქართველო გადავიდა უფრო მძლავრ მთავრობის ხელში. რუსის მთავრობამ ბოლოს-და-ბოლოს, ასისწლის განმავლობაში, მოსპო მთიელის თვითმმართველობა, მისი თავისუფლება. მთის აჯანყება 1804 წ. (იხ. ფრონელის წიგნი), ჩემის აზრით, სხვა მიზეზებთან ერთად, ამ გარემოებითაც აიხსნება: მთიელი ხედავდა, რომ ახალი მთავრობა, ღღეს თუ ხვალ, შელახავდა მის თემობრივ წეს-წყობილებას, მის წმინდათა წმინდას, თუმცა, ეს ზემოდაც ითქვა, მეტის სიფრთხილით მოქმედებდა ჩვენ მთაში და თავის განძრახვებს პირველ ნაბიჯიდანვე არ ახორციელებდა. მისი კანონი არსად სჩანდა. პირიქით საქართველოს ყოველი კუთხე საერთო კანონით და ადგილობრივ ჩვეულებით და ადათით ხელმძღვანელობდა, რაიც რუსის მთავრობამაც დაადასტურა. მაშასადამე, ვიმეორებ, რუსის კანონს იმ ხანებში არავითარი გავლენა არა ჰქონდა მთიელის შინაურ ცხოვრებაზე, მთ უმეტეს — ქორწინებაზე. აქედან აშკარაა, რომ მაყვალას დაბრუნება ქმრის ოჯახში რუსის კანონის გავლენით არ აიხსნება. ამიტომაცაა, რომ თემობამ გააქორწინა (სად იყო ეკლესია?) მაყვალას და გელას შეუღლება. აქედან მკითხველი დაასკვნის, რომ მეორე დამცველის ცდამაც უნაყოფოდ ჩაიარა: მაყვალა ვერ გაამართლა, თუმცა უდანაშაულოდ აღიარა იგი.

P. S. ნაფიცმა მსაჯულებმა ორ წამში გადასწყვიტეს მთელი მთის საქმე. ამათ ვერ დაინახეს ვერც საქმის სერიოზული შინაარსი, ვერც თავიანთი მეტად მძიმე მოვალეობა ხალხის წინაშე. ესენი მოიქცნენ, როგორც ლ. ნ. ტოლსტოის „Восрещенье“-ს სასამართლოს თავმჯდომარე, ხოლო რასაკვირველია, სულ სხვა საბუთით. ამათი ვალი იყო, თავიანთი მსჯელობა საჯაროდ მოეხდინათ. ხალხს უნდა გაეგო თავის წარმომადგენლების აზრი მაყვალას საქმეში; ხოლო ამ შემთხვევაში მათ მსჯელობას და გადაწყვეტილებას ექნებოდა აღმზრდელი მნიშვნელობა... ამის მაგიერ ნაფიცმა მსაჯულებმა „კეკა-მალულა“ ითამაშეს.

მთავრობის წარმომადგენელნი — მოსამართლენი? ესენი ხომ მუნჯნი ყოფილან!..

საინტერესო და საჭიროცაა ვინმემ აგვიხსნას, როგორ მოხდა მაყვალას გასამართლება მსაჯულთა შორის.

ალბანელი.



რედაქტორ-გამომცემელი: პეტრე სურგულაძე.